



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**FRANCISCI|| XAVERII EPISTOLA-||RVM LIBRI|| QVATVOR||**

**Francisco <de Javier>**

**Mogvntiæ, 1600**

**VD16 J 197**

Epist. lib. secundi.

**urn:nbn:de:hbz:466:1-43721**

# FRANCISCI XAVERII EPISTO-

LARVM LIBER

SECUNDVS.

*P. Paulo Camerti. Goani Collegij Re-  
ctori. Epist. I.*

*Gratia, & caritas Christi D. N. &c.*

M i Paule, quod ego te & coram,  
& per literas s̄epius oraui, idem  
nunc summopere quaſo atque  
obſecro, vt omnibus in rebus i-  
ſtius Collegii moderatoribus obtemperes  
ſedulo. Evidem ſi tuo eſſem loco, nihil an-  
tiquius haberem, quam vt eis omnino mo-  
rem gererem. Credas enim mihi, tibiq; per-  
ſuadeas velim, nihil eſſe tutius, atq; ab omni  
errore remotius, quām ſemper optare ſibi  
ab aliis imperari, & imperantibus ex animo  
obtemperare. Contraque lubricum ac peri-  
culosum eſſe negotium, ad ſuum arbitrium  
viuere, omissio eorum, qui præſunt, imperio.  
Nam vt ab eo quod præſcribitur deflectens  
recte aliquid facias, tamen ſic habeto, frater  
cariffime in eo plus pravi eſſe, quā recti. Pro-  
inde P. Iacobo Borbano, cuius voluntas cum  
diuina voluntate congruit, omnib' in rebus  
accurate

accurate parebis: omninoq; in eius eris potestate. Id si feceris, ne tu mihi solū, sed D E O quoq; rem gratam feceris. Socios ad me mittas duos ex iis, qui in Comorino Promontorio versantur, nominatim vero Ioannem Beiram. Horum in locum totidem substitues ex eorum numero, qui recentes sunt è Lusitania. Obsecro autem eos, qui venturi sunt, ut quoniam pro multitudine locoru, ac negotiorum magnitudine, tam pauci è Societate sumus, alienos homines aliquot secum adducere conentur, qui ad harum insularum pagos Christianis præceptis imbuedos usui nobis sint, & subsidio. Si sacerdotes non erunt, certe sint ex iis, qui à mundo, carne, Diabolo iniuriose tractati, suas pariter, & D E I iniurias vlcisci in semetipsis expectunt. Instrumentum apparatusq; necessarium sacrificij secum afferent. Sacros autem calices stanneos præstat esse: sunt enim argenteis tutiores à gente non sancta. Ethnici dico, inter quos versamur assidue.

Augustiniani fratres quidā Hispani Goā hinc veniunt, ex quibus de meis rebus cognoscere licebit, si quid voles. Hos ego tibi sic commendō, ut quibuscumque rebus poteris, eos velim iuves, idq; summis, vel benignitatis indiciis, vel benevolentia. Viri quippe religiosi sunt, planeq; sancti. Ego in Mauritā discedo. De' tecū mancat, me comitet,

ani-

animosq; nostros demum in suum regnum  
trāsferat, vbi profecto fruemur maiore, quā  
hic & quiete & gaudio. VI. Idus Maij. M. D.  
XLVI. Ex Amboino.

Inclusam epistolam continuo ad Comorinēses socios perferēdam curabis, vt Goam  
profecti, ineunte Aprili mense anni in se-  
quentis in Molucum soluant.

*Sociis Comorinensibus. Epist. II.*

*Gratia, & caritas Christi D. N. &c.*

**A**NNO superiore scripsi ad vos Malaca  
abinas literas, eodem exemplo, quibus  
vos Frācisce Beira, & Antoni Criminalis per  
DEVM orabam, vt confessim in Comori-  
num Promontorium contenderetis. Placuit  
enim vos illuc proficisci ad instituendos fo-  
uendosq; miseros illos Neophytes, vna cum  
P. Francisco Mansilla, quem apud Christianos  
cum Francisco Lisiano, aliisque sacer-  
dotibus indigenis tribus reliqueram. Quod  
vt maiore vestro merito fieret vobis pla-  
ne pro vestro obedientiæ studio impera-  
bam. Non dubito, quin & redditæ literæ sint,  
& eis obtemperatum. Ego Malaca Kalend.  
Januariis Molucum versus discessi XVI. Ka-  
len. Martias appuli ad Amboinum insulam,  
ibique statim Christianorum vicos, qui in  
hisce insulis sunt, obiens infantes baptismo  
expiaui. Sub id tempus Ferdinandus Sosa  
cum

ēum Hispanorum classe, quæ ex noua Hispania Molucum petebat, ad Amboinum applicuit. Naves erant numero octo, quæ tantum mihi attulerunt negotij, quantum nullis verbis consequi possem. Perspexi interea sensus indigenarum; speroq; Deo bene iuuante futurum, ut vbi Iordanes Freita Moluci Præfectus vir religionis propagādæ cupidissimus, idemque Amboini Dynasta, ibi sedem ac domicilium collocarit, (quod proximo anno fakturus dicitur) incolæ oēs Christi sequantur fidem. Insula in circuitu est millia passuum circiter nonaginta, frequentibus vicis habitatur, ex quibus septem sunt Christianorū. Ab Amboino millia passuum prope CCCC. regio est in continentí Maurica nomine, vbi Christianos plurimos, eosq; Christianæ disciplinæ plane rudes esse cognoui. Itaque eò traiiciam quamprimum.

*Amboinæ  
Insula.*

Hoc ideo vos scire volui, ut intelligeretis, quantopere vestra opera desideretur in his locis. Et quanquam non sum nescius vos isthic nequaquam esse otiosos; tamen quoniam hic plane estis necessarij, per Christum vos oro Franciscę Mansilla, & Franciscę Beira, ut quamprimum in hæc loca transmittatis: atque ut hoc iter maior vobis sit obediētiæ, ac meriti materia, idipsum plane impēro. Quod si forte vestrū aliquis excessit è vita, substituatur aliis ad arbitrium P. Anto-

F. nij

nij Criminalis, sed ita, ut è tribus vnuſ apud  
**Comorinenses** Christianos maneat cum in-  
digenis sacerdotibus. Si qui hoc anno è So-  
cietate supplementi causa venerint è Lusi-  
tanias, eos ego per DEVM oro, vt in Como-  
rinum Promontorium ad Christianos illos  
erudiendos proficiscantur. E Lusitania si  
quid erit noui, ad me perscribetis, Lusitani-  
casque literas tradetis Patribus Molucum  
petituris. Ut autem socij recentes è Lusita-  
nia plus obtemperando mereantur, eos in  
**Comorinum** Promontorium pro imperio,  
ac potestate ire iubeo. Et quoniā video haſce  
vobis literas vix intra Kal. Martias proximi  
anni reddi posse. Kalendis autem Maij regia  
nauis è Goa Molucum versus solutura est,  
ea vos naui huc aduehi volo. Quocirca hac  
epistola perfecta, illico è Comorino Promō-  
torio remigrabitis Goam, & ad Molucēsem  
profectionem, vt dixi, vos comparabitis. Ea-  
dem naui Molucenses Regem suum, quem  
propediem expectant, sperant esse venturū.  
Lusitani quoque arbitrantur nouum Molu-  
ci præfectum, qui arcem obtineat, pariter  
vectum iri. Si Rex quē dixi Christiana Goz  
sacra suscepit, magna me ſpes tenet, popula-  
rium quam plurimos ad Christi fidem ac-  
cessuros. Verum vt ille nolit esse Christia-  
nus, vos quidem certe egregiam hic Christo  
operam eftis nauaturi. Singuli sacram mifſe  
ſupel-

supellecstilem afferetis; calices autem stan-  
neos, quo facilius *gentis non sanctæ*, apud quā  
versandum erit, auidas eludatis manus. Et  
quoniam vos vt pote homines ē Societate  
Iesu, quod ego vos per Christum oraui, pro  
vestro obedienti studio imperauai, facturos  
esse cōfido, nihil prēterea dicam, nisi vt huc  
properetis; vos n. vehementer expecto. Nec  
dubito quin vester aduentus Deo fauente, &  
satis per se opportunus, & Christo gratus, &  
huic gēti sit salutaris futur⁹. Vos rogo fratres  
mei, vt aliquot Goani Collegij alumnos Sa-  
cerdotes vobiscum deducatis, qui vos in tra-  
denda hisce insulis doctrina Christiana iu-  
uare queant. Certe vterque socios sibi sin-  
gulos asciscat, si non Sacerdotes, at clericos  
mundo, Dæmoni carnique infensos & acce-  
ptas ab his iniurias vlcisci cupientes. Nos  
Devs viuos in suo obsequio, mortuos in suo  
regno pro sua benignitate coniungat, vbi  
profecto longe maior, quam hic est, quies ac  
lætitia nos manet. VI. Id. Maias. M. D:XLVI.  
Ex Amboino.

*Societati Romam. Epist. III.*

*Gratia & caritas Christi, D. N. &c.*

**S**CRIPSI ad vos anno superiore Rēges  
duos in insula, quam Macazariam appell-  
lant, cum magno popularium suorum nu-  
mero ad CHRISTI religionem esse traductos.

F 2

Ego

Ego igitur occasione rei bene gerendę inuitatus (apertum enim mihi aditum videbam ad Euangelium longe ac late propagadum) confessim ex Comorino Promontorio solui, ut eo quamprimum appellerem. Abest Macazaria à Promontorio amplius vices centena, & septingēta millia passuum. Prius quām nauim confunderem, curaui sedulo, ne quid Comorinensibus Christianis deferset eorum, quę ad sacrorum religionem studiumque pietatis pertinerent. Quinque igitur eis præposui sacerdotes, Franciscū Mansillam ē Societate, indigenas tres, & Franciscum Lisanum oriundum ex Hispania. Nā Christianos incolas Ceilani insulæ, quæ non longe abest à Comorino Promontorio, egregie instituunt Franciscani duo, cum totidem Sacerdotibus. Ita factum est, ut neutri Ecclesiæ mea opera esset opus: cæteri enim Christiani, qui sunt in oppidis Lusitanorum à singulis Episcopi Vicariis erudiuntur. Cū meam igitur operam Indiæ minime necessariam esse intelligerem, Meliaporam, quod oppidum hodie S. Thomæ nomine appellatur, petij, ut illinc in Macazariam pergerem. Ibi mercator me cōuenit obsecrans, ut confitenti operam sibi darem. Is confessione rite peracta, diuinitus commotus est adeo, ut postridie pecuniam ex mercibus, ac nauigio redactam dispergit pauperibus: nudusque nudum

nudum CHRISTVM sequens mihi se sociū adiungeret. Inde cum soluissemus, Malacam applicuimus vrbem sane celebrem Regis Lusitani. Hic narrauit mihi Præfectus vrbis missum ab se nuper in Macazariam Sacerdotem egregia religione præditum cum nō contemnenda Lusitanorum manu, vt si quis motus exoriretur, præsidio esset nouis Christianis. Itaque monuit, vt Malacæ tantisper subsisterem, dum nauis qua illi vecti erant, rediret, & quo in statu res esset, renuntiaret. Ergo Præfecti consilium secutus tres menses, coque amplius Malacæ sum commoratus. Neq; defuit interim materia bene merendi. Festis ac Dominicis diebus in æde sacra conciones habebam ad populum; reliquum tempus ferme consumebam in ægrovrum, apud quos in valetudinario diuersabar, confessionibus audiendis, eorumque miseriis subleuandis. Neophytes quoq; ac præcipue pueros Christianæ doctrinæ elementis imbuebam: milites ac ciues odio inter se dissidentes ad pacem concordiamq; reuocabam. Quotidie post occasum solis cum tintinnabulo vrbem obiens ciues sonitu excitatos admonebam, vt pro animis, quæ purgatorio igni cruciaretur, diuinam implorarent clementiam. Has subinde voces iterantem puerorū grecè Catechismi schola prosequebatur non sine magno ciuium motu.

F 3 Postea

Postea vero quām ventos è Macazaria reuertentibus opportunos refedisse vidi, nul-lumque de sacerdote, ac militibus eò missis nuntium afferri; non diutius mihi cunctandum putaui. Itaque Malaca soluens in Molucum vela feci. Arx est in Moluco Regis Lusitani Ternate nomine ab India remotissima. Ab hac arce millia passuum prope ducēta insula est Amboinus. Indiæ propior, quæ circuitu quatuor & nonaginta passuum millia amplectitur, satis frequens non indigenis modo, sed etiam aduenis. Hanc insulam Rex Lusitanie Lusitano Duci virtute ac pietate clarissimo dono dedit, quem intra biennium eò cum coniuge, liberis, vniuersaque familia commigraturum ferunt. Hic oppida sunt Christianorum omnino septem, quæ ego circumiens infantes omnes, ac pueros nondum baptizatos rite lustrauī. Ex quorū numero complures sub baptismum excesserunt è vita, ut satis appareret, vitam illis suppeditatem diuinitus, usque eo dum ad æternam vitam patefactus aditus esset. Sub id tempus octo Hispanorum naues eo dela-tæ tres ibidem substitere menses. Quo toto tempore diei vix potest, quot, quantisque occupationibus distinerer. Nam & concionibus omnes excitabam ad rectam honestamque vitam, & peccata confitentes audiabam, & visitabam ægrotos & morientes

confitebam.

confirmabam, ut æ quo fidentique animo è vita discederent: quod quidem longe difficillimum est iis, qui diuinis legibus minime paruerunt. Quippe hoc minore diuinæ clementiæ spe, fiduciaque moriuntur, quo maiore ante audacia in scelerib⁹, ac flagitiis voluntabantur: Multi præterea, qui graues inter se inimicitias exercebant (quod vitiū inter milites latissime patet) in gratiam iuuante Deo, reduc̄ti. Inde illi Indiam, ego cum Ioanne Duro, de quo supra dixi, cōtrario cursu Molucum petiimus.

Vltra Molucum millia passuum prope ducenta Regio est, quæ Maurica dicitur. In ea multis ab hinc annis ingens hominum multitudo Christianis sacrīs initiata est, sed morte sacerdotum, à quibus instituebantur, deserti atque orbati ad pristinam barbariem feritatemque redierunt. Omnino terra periculorum plenissima est, & aduenis maxime infesta, propter gentis immanitatem insignem, & varia veneni genera, quæ in cibo; ac potionē dari vulgo solent, quæ res sacerdotes peregrinos deterruit, quo minus illuc accederent ad incolas iuuandos. Ego igitur animaduertens quanta necessitate vrgeantur, quos nemo doceat, nemo expiet sacramentis; in animum induxi meum, debere me vel cum capitib⁹ periculo consulere illorum saluti. Quocirca quamprimum eò me

F 4 conferre

conferre statui, & caput meum in discrimen offerre. Evidem omnē in Deo spem locatam habeo, cupioque, quantum in me erit. Christo Domino obtemperare admonenti. *Qui voluerit animam suam saluam facere, perdet eam, qui autem perdiderit animam suā propter me, inueniet eam.* Quæ quidem sententia cogitati facilis est, experienti non item. Vbi enim tempus incidit, cum vita amittenda est, ut eā in Deo inuenias, cū mortis periculum intenditur, sic ut facile prospicias, si Deo pareas, vitā esse dimittendā; tū vero nescioquomodo fit, ut q̄ ante preceptū dilucidum videbatur, incredibili inuoluatur obscuritate. Nam ne doctissimi quidem viri tam preclarę sententię vim consequuntur, sed ij duntaxat, quos singulari beneficio Deus ipse interior magister instituit. Atque in eiusmodi rebus facile apparet, quanta tandem nostra sit imbecillitas, quam fragilis & infirma humanæ naturæ conditio. Complures mei me amici vehementer orabant, ne tantæ feritatis gentem adirem. Postea vero, quam nec precibus, nec lacrymis, quicquam se proficere senserunt, præsentissima remedia contra omnia venena pro se quisque afferebant, quæ ego constanter remisi omnia, ne videlicet medicamentis onust' onerarer etiam solitudine, qua carebam. Cum enim omnem spem meam collocasset in diuinæ prouidentiæ præsidio; cauendum mihi existimabam

bam, ne humanis præsidiis fretus deperderem aliquid de fiducia DEI. Itaq; eis gratias egi, & simul omnes obsecraui, vt pro mcDèū deprecarentur: Hoc remedio nullū præsentius posse reperi.

Sed vt ad Moluçense iter reuertamur. Navigatione vsi sumus minime secunda. Multatum piratarum, tum tempestatum pericula adiuimus, illud maximum. Ingenti nauis uehebamur, quæ tempestatis impetu in syrtes abrepta, tria millia passuum ita confecit, vt imum gubernaculum perpetuo arenam perstringeret. Quod si vel in latentes scopolos vel in vada inæqualia incurrisset (quod omnes ne accideret, subinde extimescetbamus) certe facto naufragio interissemus vniuersi. Multum ibi lacrymarum vidi, multū solitudinis, & angoris, cum omnes in singula momenta mortem expectarent. *Periculorū  
vtilitas.*

Verum noluit D E V S nos perdere, sed periculis erudire, vt vsu docti intelligeremus, quām infirmæ sint opes nostræ, quoties aut nostris viribus, aut præsidiis nitimur humanis. Nam vbi senseris, quam fallaces sint spes tuæ, & humanis opibus omnino diffisus in illo rerum omnium moderatore, qui vnuis pericula ipsius causa suscepta facile propulsare potest, spem omnem posueris, tum vero plane experiaris, DEI imperio, ac nutu omnia gubernari, & quantumuis vitæ discrimen præ cœlestib. gaudiis, quæ in tali re, ac

F 5 tempore

tempore diuinitus impertiri solent, esse cōtemnendum. Quanquam ne mors quidem ipsa pertimescenda est iis, qui diuina illa voluptate perfruuntur. Etsi autem fit nescio quomodo, vt periculis perfuncti eorū magnitudinem nullis verbis cōsequi possimus; manet tamen iucundissima beneficij diuini memoria, quæ nos dies, noctesq; stimulat ad labores pro optimo Domino, vel suscipiendos libenter, vel fortiter preferendos: & simul efficit, vt eum in omni vita veneremur, sperantes fore, vt idem pro sua infinita benignitate vires nobis, & animos addat, quo tā benigno Domino operam sedulo constanterque nauemus.

Cum essem Malacæ incidi in mercatorem Lusitanum, recētem ex opulētissimo Regno Sinarū. Is mihi narrauit, se ab homine Sina honesto sane & graui, atq; in vrbe regia satis versato interrogatum, num Christiani suilla carne vescātur; respōdisse, Christianos quidem suillam non aspernari, se tamē libenter auditurum, cur tandem id sciscitaretur. tum Sinam dixisse, nationem esse quādam in medio Sinarū Regno montibus inclusam, moribus, institutisq; longe abhorrentem ab Sinis, quæ ab suilla penitus abstineret, & multis dies festos solemni ritu celebraret. Hæc mihi mercator cum exposuisset, nō satis cōiicere potui, vtrū hi, quos Sina describebat,

Chri-

*Gens apud  
Sinas suilla  
carne ab-  
stinenſ.*

Christiani essent, ex eo numero, qui ritus  
Hebrææ legis cum Christi religione coniungunt,  
quales Æthiopes maris rubri accolant  
scimus esse, an Iudæi, qui sunt toto terrarum  
orbe dispersi. Nam Saracenos non esse, au-  
dio constare inter omnes. Complures mer-  
catores è Malaca in Sinas commeant quot-  
annis; horum multis ego mandaui, vt diligē-  
ter cognoscant, qui tandem sint illius gentis  
mores, qui ritus, quæ leges, & instituta, vt his  
tandem vestigiis eius conditionem inuesti-  
gem; exploratumque habeam, Iudæi ne sint  
an Christiani. Neq; enim desunt, qui S. Thomam <sup>Opinio est</sup> Apostolum in Sinas penetrasse confir-  
ment, magnumque eorum numerum ad <sup>s. Thomam</sup> <sup>in sinas pe-</sup>  
**CHRISTI** fidē adduxisse. Nam prius quam <sup>netrasse.</sup>  
Indiam Lusitani in suam redegissent ditio-  
nem; Græca Ecclesia eò mittebat Episco-  
pos, qui Christianos S. Thomæ, eiusque di-  
scipulorum opera propagatos tueretur. Cū  
primum igitur Lusitani India potiri cœpe-  
runt, vnu ex Græcis Episcopis, quos dixi,  
affirmasse fertur, sese cognouisse de aliis Epi-  
scopis, quos in India inuenerit, S. Thomam  
Sinarum fines ingressum eoru oppida pera-  
grasse, Euangeliisque diuulgato indigenas  
plurimos CHRISTO peperisse. Cum pri-  
mum aliquid certi habuero, aut ab aliis  
compertum, aut mea opera exploratum;  
vos faciam certiores. Antequam Malaca  
disce-

discederem, cognoui Goam appulisset tres e  
Societate, qui cum suis literas quoque Ro  
manas ad me perferendas curarunt. His ego  
perlectis, enim uero triūphaui gaudio, quod  
ea, quæ maxime vellem, de Societatis rebus  
acceperam. Et quoniam ex tribus illis, unus  
venerat, ut in Collegio S. Fidei alumnos li  
teras doceret, reliqui duo ut ibi potissimum  
versarentur, ubi maximo rei Christianæ e  
molumēto mihi viderentur futuri; cōfestim  
ad eos scripsi, ut relicto Goæ alumnorum  
magistro, cæteri pergerent in Promonto  
rium Comorinum, ibique cum Francisco  
Mansilla Neophyto erudirent. Nunc vero  
mutata sententia eos in Molucas insulas an  
no proximo venire iubeo: quod videam his  
locis Christianæ religionis propagandæ op  
portunitatem longe maiorem,

*Moluccas.*

Molucus regio est modicis, ac prope in  
numerabilibus discreta insulis: nec satis ad  
huc exploratum est, an pars eius aliqua sit in  
cōtinēti. Omnes ferme insulæ vicis frequē  
tibus habitantur. Incolæ porro ipsi facile se  
adiungerēt Christo, nisi hortatores deessēt.  
Nimirum si aliquod in his locis esset Socie  
tatis domicilium, plerique Christiana sacra  
fusciperent. Itaq; omnino decreui efficere,  
ut in hisce vltimis terris, aliqua tandem ra  
tione sedes collocetur nostris hominibus.  
Iam nunc enim prospicio, quot populos ea  
res

res CHRISTO sit aggregatura. In hac insula Amboino Ethnici longe plures sunt Saracenis, atque ab eis acerbo dissident odio. Quippe illos Saraceni aut Mahometis ritus suscipere, aut sibi seruire cogunt. Ethnici autem plerique, utpote qui magis etiam Mahometis nomen oderint quam iugum seruitatis, illorum superstitionem repudiatur funditus. Si essent, qui eos instituerent ad veram religionem, haud magno negotio ad Christi ouile aggregarentur; longe enim minus a Christi, quam a Mahometis nomine abhorrent. Septuagesimo ab hinc anno Mahometica pestis invasit hanc insulam, cum ante id tempus incole omnes essent Ethnici. Id malum nonnulli Mahometis antistites ( Cacizes vocant ) invexerunt, qui e Meca Arabiae urbe, vbi exsecrandum Mahometis corpus summa superstitione colitur, profecti cum in haec loca secesserent, magnam hominum multitudinem ad suam pertraxe-re sectam, Saraceni indigenae penitus rudes, & ignari sunt pestilentis illius disciplinae, quam sequuntur. Itaque in spem venio fore, ut facile abducantur a Mahometicis ritibus. Haec omnia eo fusi ad vos scribo, ut huiusc meae solitudinis participes magnus, ut par est, capiatis dolorem extam miserabilis tot animorum interitu, qui omni ope destituti quotidie pereunt. His opitulari qui cupiunt,

Saracenis  
Moluco.

cupiunt, ne cunctentur. Nam ut litteris, cæterisque facultatibus non sint satis instructi, satis tamen erunt ad hoc munus parati, si in animum induixerint suū, huc Christi vnius causa venire, cum hisce hominibus versari, atque in huius tam præclari studij contentione extremum spiritum edere. Hoc animo si duodeni tantum quotannis venirent; næ ista Mahometis secta funditus deleretur, ac breui ad Christi fidem se adiungeret omnes. ita demum fieret ut haudquam tam nefariis, impiisque sceleribus DEI numen ab hac gente violaretur propter veræ religiosis inscitiam. Etenim qui hanc insulam colunt, fere sunt homines immanes ac barbari, perfidia insignes, & mirandum in modum ingrati. Sunt etiam insulæ nonnullæ in hoc maris tractu, quarum incolæ humana carne vescuntur, præsertim hostium, qui in pugna ceciderint. Quod si quis domesticorū morbo intereat, à cætero quidem abstinent corpore, sed manus ac pedes præcisos in deliciis habent. Atque etiam (si famæ libet credere) eo immanitatis progrediuntur, vt si cui laetus conuiuum sit apparandum, postulet à vicino patrem natu grandem, quem iugulatum vicinis ad epulandum apponat: postulet autem ea conditione, vt ipse vicissim patrem gratiam repromittat ei, à quo hoc beneficij petit, si quando is voluerit consimile instrue-

instruere conuiuum. Tanta porro sunt, tamque immani libidine, ut omnes suscipiant impuritates. Intra mensē proficisci in insulam cogito, vbi præter inaudita flagitia, facinus vtrunque committi vulgo solet, vt & cæfos in prælio comedant, & parentes affecta ætate, vicinis mutuos dent ad epulas. Causa proficisci est, quod eos à tam nefariis sceleribus, ac flagitiis ad Christianam pietatem conuerti velle cognoui.

Insulæ sunt mira cœli tempèrie, proceris densisque arboribus frequentes, crebris im- Maurice  
bribus irrigatæ, præruptis vndique munitæ Insula.  
rupibus, arduæque & excelsæ adeo, vt incolis haud quaquam opus sit mœnibus ad hostium impetum propulsandum. Cum enim bellum ingruit, satis tutos se fore confidunt, si se ad rupes recipiant suas, quarum calles usque eò ardui sunt & saxis impediti, vt nullus apud eos equorum usus nec sit, nec esse possit. Cæterum crebri ibidem terræ motus existunt, adeo ingentes, vt qui forte præteruehuntur, naues suas obiectis cautibus oecursare credant. Accedit terræ fremitus tantus, vt incredibilem omnibus terrorem incutiat. Multæ ex his insulæ procul emitunt ignem: flamas autem euomunt tanto fragore, quantum nulla tormenta ænea, quamuis magna edere solent, cum summa

viiia-

vi iaculantur globos. Huius quippe ignis vi  
atque impetu ingentia s̄æpe ſaxa iactantur.  
Voluit D̄eūs videlicet iis, quos nemo de  
pœnis impiorum admonebat, quaſi infero-  
rum fedem aperire, ſpeciemque præbere  
quandam illius incendij, quo ſunt ſcelesti  
homines perpetuo cruciandi, ut horrendo  
illo ſpectaculo admoniti tandem intellige-  
rent, quæ illos manerent ſupplicia, niſi ex  
nefariis ſceleribus, ac flagitiis emergerent.  
Hæ insulæ omnes inter ſe differunt lingua,  
atq; etiam nonnullarum incole non eodem  
omnes, ſed pagi alij alio ſermone vtuntur.  
Veruntamen Malacensem linguam propter  
commercium intelligunt omnes. Quocirca  
cum adhuc eſſem Malacæ Symbolum Apo-  
ſtolorum cum appoſita explicatione, com-  
munis confeſſionis formulam, orationem  
Dominicam, Salutationem Angelicam, &  
decem legis præcepta in Malacensem ſer-  
monem vertenda curauit, ut me de rebus di-  
uinis verba faciente apud eos, planius intel-  
licherent quæ dicerentur. Nulla ferme habet  
monumēta literarū: nec ſcribere vulgo no-  
runt, nec legere: pauci in ſcribendo Arabicis  
notis vtuntur, verbis Malacensib⁹. Arabes  
quippe Mahometicæ ſuperftitionis Antifti-  
tes, quos Cacizes, ſeu Alfaques appellant, nō-  
nullos indigenas ſcribendi rationem nuper  
docuerunt ut hodie docent. Nam ante Ma-  
hometis

hometis ritus inuectos, nullus omnino a-  
pud incolas usus erat literarum.

In hac insula Amboino rem vidi incredi-  
bilem, & ante hoc tempus inauditam, quam  
fortassis operæ pretium erit cognoscere. Ca-  
prum, inquam, vidi lacte suo paruos alētem <sup>Caper lao  
prabes haec  
dis.</sup>

hædos: vberem enim quod prope genitalia  
vnicum habet, tantum lactis reddebat quo-  
tidie, quantum scutella capere potest. Ego  
ipse rem perspexi his oculis, neque enim ali-  
ter, ut crederem adduci potuisse. Hunc ca-  
prum Lusitanus quidam vir honestus secum  
asportat eo consilio, ut in Lusitaniam mit-  
tat. Sed ut ad iteū meum reuertar, vos ego  
Patres fratresque carissimi per CHRISTVM  
IESVM rerum omnium Dominum, per sanctissimam eius parentem, per cœlestes  
ciues, qui æterna gloria fruuntur, oro quæ-  
soq; , ut mei memores assidue pro me sumo  
studio deprecemini DEVVM. Videlis. n. profe-  
cto quāto mihi præsidio opus sit. Ac sèpenu-  
mero sensi in multis corporis animiq; peri-  
culis vestrasi mihi preces saluti fuisse. Evidē-  
ne mihi ex animo excideretis, vestrū omniū  
nomina vestro chirographo in epistolis ad  
me missis subscripta, simul cū solemnī meæ  
professionis formula circumgesta: & pro  
singulari voluptate, quam percipiō ex tam  
iucunda recordatione, primum DEO. vt par-  
est, gratias ago, deinde vobis Patres fratresq;

G suauis.

suauiissimi, quos Deus tot, ac tantis virtutib<sup>9</sup>  
ornauit. Et quoniam confido fore, vt vobis  
haud paulo iucundius fruar in æterna vita,  
pluribus in præsentia vobiscum agere super-  
fedeo. VI. Idus Maias. M. D. XLVI. Ex  
Amboino.

P. Ignatio Loiolæ Præ. Gener. Romam.  
Epist. IV.

Gratia & caritas Christi D.N. &c.

**D**EVS mihi conscius est, quantopere in  
hac quoque vita te videre expetam,  
Pater carissime, vt tecum multis de rebus  
communicem, quæ tuam opem, ac remediū  
desiderant: Nulla enim locorum spatia ob-  
stant obedientiæ. Video in his locis è Socie-  
tate esse permultos: rursusq; nos animorum  
nostrorum medico multum egere video. Per  
ego te I E S V M Dominū oro, & obtestor, Pa-  
ter optime, vt his quoque filiis tuis, qui in  
India versamur, prospicias: virumque mit-  
tas aliquem virtute ac sanctitate præstātem,  
cuius vigor & alacritas torporem excitet  
meum. Magna me spes tenet, quoniam diui-  
nitus animorum nostrorum affectiones tu-  
te perspicis, abs te operam datum iri dili-  
genter vt omnium nostrum iam lan-  
guescens virtus ad perfectio-  
nis studiū vehemen-  
tius incitetur.

Nihil

Humilitas.

Nihil magis hęc terra ab Societate nostra,  
quam concionatores desiderat. In his, quos  
huc magister Simon submisit, nemo est (qui  
sciam) concionator. Lusitani autem Indianam  
incolentes pro suo egregio erga nos studio,  
ac benevolentia idoneos nostrę Societatis,  
concionatores exoptat mirum in modum.  
Proinde te per D E V M eiusque cultum ob-  
testor, vt tam pij, iustique illorum postulati  
memor, aliquot huc mittas Patres ad id mu-  
nus appositos, qui rectum errantibus salutis  
iter ostendant. Quos præterea è Societate  
missurus es, vt Euangelij causa Ethnicorum  
vicos peragrent, hos tam spectata probitate  
oportet esse, vt tuto & comitati ire possint &  
soli, quounque eos Christiana res vocet,  
velut in Molucum, in Sinas, in Iaponiam.  
Vel ex Sinarum, & Iaponiæ, earumque gen-  
tium descriptione, quam his inclusam literis  
ad te mitto, facile intelliges, cuiusmodi tan-  
dem ipsares expertat viros.

Pontificias Indulgentias, priuilegiumq;  
arę maximę nostri collegij, item potestatę  
sacerdotibus, vt rematos populos Chrisma-  
te inungant pro Episcopo, de quib⁹ ad te su-  
perioribus annis scripsi; incredibiliter expe-  
ctamus. De Quadragesima vsus me docuit,  
nihil admodum necesse esse quicquam im-  
mutari. Nam Lusitani adeo locis disiuncti  
sunt in India, vt si cōmodum spectes publicū

G 2 nulla

nulla immutatione opus sit. Neque enim hyems eodem tempore per omnes Lusitanorum ciuitates, atq; oppida vagatur. Quare habita cōmunis boni ratione, satius duco, nihil decerni super ea re noui, etsi video non deesse, qui contra sentiant.

Nondum plane constitui vtrum ego ipse cum vno, aut altero ē Societate Iaponiā post sesquiānum petā, an eò duos ē Societate prēmittam. Nam certū est mihi, aut ire, aut alios mittere. Atque vt nunc est, inclinat animus in consilium eundi. DEVm oro, vt quod magis ei cordi est, id liquido præscribat mihi. E tribus sociis, qui Molucum petierunt, vi sum est vnum eligere, qui præcesset cæteris. Itaque Ioannem Beiram delegi, cui reliqui obtemperarēt non secus, ac tibi. Id illis per gratum accidit. Idem in Promontorio Comorino, cæterisque locis, vbi plures ē Societate versantur, instituere cogito. Tu velim tua tuique studiosorum deprecatione nobis in hac barbarie versantibus cœlestem implores opem. Quod vt facias impensius,

DEVm immortalem oro, tibi vt ostendat diuinitus, quantum ego tuæ vel opis, vel o-

peræ indigeam. XIII. Kalendas Febr.

Anni à Christo nato. M. D.

XLVIII. Cocini.

M. Simoni

*M. Simoni Roderico in Lusitaniam.**Epist. V.**Gratia & caritas Christi D. N. &c.*

**M**AND o tibi frater carissime, ut pro tuo  
erga IESVM amore mittas huc ali-  
quot è nostra Societate concionatores. Hu-  
iuscemodi enim hominib' maxime opus est  
in India. Ex omnibus, quos misisti nuper,  
neminem adhuc vidi præter Ioannem Bei-  
ram, P. Riberum, Nicolaumque Laicum,  
qui sunt in Moluco, & Adamum Franciscū,  
qui est Cocini. Percontanti mihi de cæteris,  
responsum est, inter eos idoneum concioni-  
bus habendis esse neminem. Illud quoque  
te per Deum obtestor, ut delectum habeas  
eorum, quos huc submittendos putes ad cō-  
uersionem Ethnicorum. Probatę probitatis  
ac spectatę virtutis viros deligas necesse est,  
qui scilicet aliquot annorum spatio retule-  
rint multas egregiasque de seipsis victorias.  
Eosdem autem non infirmos, sed validos es-  
se oportebit, Indici enim labores non animi  
solum virtutem, sed corporis etiam vires de-  
siderant. Nimirum magnam Rex à Deo ini-  
ret gratiam, si in Indiam mitteret Concio-  
natores è nostra Societate quamplurimos,  
ad eo Indorum gens vniuersa ruditis est & im-  
perita. Hęc ad te scribo pro vsu, quem horum  
locorū iam habeo. Quod si forte Christianę

G 3 reli-

religionis propagatio in Ethnicorum regnis magnas habere videtur difficultates, caue propterea ab incepto deterrearis, prima quippe ac potissima difficultas in nobis est. Itaque nostros homines primum, deinde Ethnicos curandos censeo. Quæso te in annum proximum elabora, quantum potes, per D E V M , vt concionatores habeamus idoneos. De rebus Indicis nihil ad te scribo, quod Malaca in Indiam redij octo ab hinc diebus; neque dum quicquam fere de iis cognoui: quæ autem cognoui, eiusmodi sunt ut cognosse pœniteat. Comites mei, vt opinor, de hisce rebus omnibus ad te prescribunt. Quos è Societate ad Ethnicorum conuersionem destinabis, tales esse debebunt, vt tuto vel comitati, vel soli mittantur quoconque opus sit, siue in Molucum, siue in Sinas, siue in Iaponiam, siue in Regnum Peguanum, siue aliò. Apud quamvis harum gentium homines etiam non litteratissimi, modo egregia virtute praediti, egregiam D E O nauare operam possunt.

Vnum est, de quo pro suis plurimis ac maximis erga Societatem nostram promeritis Regem Lusitanie admonitum velim, cuius precipue interest, suorum primum, deinde Ethnicorum, qui in eius ditione sunt, saluti consulere. Exopto inquam, vt Rex

tum

tum diuini cultus gratia, tum vero ad animū suum religione exoluendum, omnibus Indiæ oppidis, quæ Lusitanis tenentur præsidii, concionatores siue ex nostris hominibus, siue ex Franciscanis, siue ex Dominicani idoneos cogat, qui cæteris expediti curis, ac soluti, Dominicis ac festis diebus antemeridiano tempore de Euangelio verba faciant ad Lusitanos; pomeridiano vero eorum seruis & ancillis, indigenisque Neophytis capita explanent fidei. Semel etiam in hebdomada apud Lusitanorum vxores, ac liberos de Symboli articulis, de sacramentis Confessionis, & Communionis sermonem habeant. Vſu enim didici quantopere ea institutio sit his locis necessaria.

Si Regem à meis fidelissimis, atq; amantissimis consiliis non abhorrere arbitrarer, saluberrimum ei darem consilium, vt quotidie per quadrantem horæ diuinam illam sententiam meditando : *Quid prodest homini si vniuersum mundum lucretur, animæ vero sua detrimentum patiatur?* germanam eius intelligentiam à Deo peteret, cum sensu animi interiore coniunctam, & simul suarum preicationū omnium illam vellet esse clausulā. *Quid prodest homini si vniuersum mundū lucretur,* & quæ sequuntur. Tempus iā est hunc Regi errorem eripiendi, quoniam proprius, quam ipse existimat, abest hora, qua illū Rex Regū, obiit.

G 4 & Domi-

Vaticina.  
tio Videatur  
Rex enim  
paulo post  
obiit.

& Dominus dominantium ad rationē red-  
dendam euocaturus est illud intonans. Redde  
rationem villicationis tuae. Quare effice, vt mit-  
tat necessaria ad fidei propagationem auxi-  
lia in Indiam.

Vna mihi omnino via ac ratio, pro vſu,  
quem habeo, videtur esse religionis in India  
propagandæ, vt Rex omnibus Indiæ Præto-  
ribus edicto denuntiet, ſe nulli tam confi-  
dere in India, quam iis, qui Christianæ reli-  
gionis fines omni ope proferre nituntur.  
Quocirca mandare ſe atq; imperare, vt Ce-  
ilanū Insulā ad Christi fidem adducendam,  
Neophytorū numerū in Comorino Promō-  
torio augendum curent ſedulo. Proinde vi-  
ros religiosos conquirant vndique, & no-  
ſtræ Societatis hominibus, itemque cæteris  
quibus viſum erit, ad diuini cultus ampli-  
ficationem vtantur. Quod ſi forte in hoc  
genere Prætores negligentes ſe præbue-  
rint, ac ſocordes; terrorem eis incutiat ac iu-  
reiurando confirmet (magnam enim inibit  
à D E O gratiam iurando, maiorem etiam eo  
quod iurarit, exequendo) niſi animum ipſi-  
us religionē exoluerint, re Christiana in In-  
dia quam maxime propagata, ſimul atque  
Olyſſipponem reuerterint, eorum ſocordiā  
publicatione bonorum, & diurno carce-  
re multaturum. Id ſi Rex edicet Prætori-  
bus, & ſimul edicti contemptores ſeuere  
acci-

accipiet; certe plerique D E O iuuante, conseruent se ad C H R I S T I fidem. Sin minus, nihil admodū proficietur. Habes super hac re quid sentiam. cætera taceo, hoc vnum dico, si fiet quod fieri expeto; ab iniuriis ac di-reptionibus vindicabuntur miseri Neophyti: cæteri haud ægre ad C H R I S T I Domini ouile compellentur. Nam in Christiana fide propaganda, si Regis, aut Prætoris desit au-toritas, profecto opera luditur. Crede mihi affirmanti, & plusquam satis erat, experto. Cur ita accidat, scio. sed dicere non est ne-cessse. Duo cupio videre in India, primum Prætores ea, quam dixi lege deuinctos, dein-de in omnibus Lusitanorum præsidiis probos concionatores. Vtraque res scilicet tum Goz, tum in reliqua India rem Christianam mirifice adiuuaret. I E S U S Dominus noster nos perpetuo tueatur. Amen. XIII. Kal. Fe-bru. Cocini.

*Societati Romam. Epist. VI.*

*Gratia, & caritas Christi D. N. &c.*

**A**NNO post C H R I S T U M natum M.D.  
XLVIII. scripsi ad vos pluribus ver-bis de insulis Molucis, quæ absunt à Malaca leucas LX. In insula Amboino, vbi Rex Lu-sitanæ præsidium habet, frequentes habitat Lusitani, qui Molucas insulas obtinent o-mnium aromatū feracissimas. Quippe cla-

G 5 uus,

uus, quém cariophyllum vulgo appellamus,  
nusquam alibi gignitur. In Amboino, vbi  
sunt septem Christianorum pagi, tres men-  
ses sum commoratus, quo tempore com-  
plures baptizaui pueros, quorū salus magno  
in periculo versabāt, q̄ nulla esset sacerdotis  
copia. Nam sacerdos, cuius fideicommissi  
erant, multo ante è vita discesserat. Cōmo-  
dum pagos omnes obieram, & infantes ba-  
ptismo lustraueram, cum septem naues huc  
appulere, quarum aliquot erant Hispano-  
rum. Hæ profectæ ex noua Hispania, que oc-  
cidentalis India vulgo dicitur, Caroli Cæsa-  
ris missu, quærebant nouas terrarum oras.  
Hæserunt Amboini menses circiter tres, mi-  
hiique attulerunt occupationum satis. Nam  
dominicis ac festis diebus conciones haben-  
dæ erant: confessiones plurimæ audiendæ  
quotidie, discordiæ sedandæ, ægri visitandi.  
omnino erant occupationes eiusmodi, vt cū  
in gente non sancta versarer, & bellicosa, tâ-  
tos pacis fructus ex ea percipere me posse  
diffiderem. Immortales D̄o gratias ago,  
qui tam benigne pacem impertit homini-  
bus, pene dicam profitentibus nullam se  
cum D̄o, aut hominibus habere pacem  
Trimestri spatio exacto, illi Indiam Lusitan-  
orum petiuerunt: ego continuo traecci  
Molucum, vbi totidem menses consumpsi  
diebus festis concionando, assidue excipien-  
do con-

*Hispanorū  
clæsia.*

do cōfessiones, quotidie pueros ac Neophy-  
tos Catechismum docendo. Dominicis in-  
super, ac festis diebus, Neophytis à prandio  
Symbolum Apostolorum vberius explica-  
bam. Ita festis diebus binas habebam cōcio-  
nes, alteram inter missæ sacrificium ad Lusi-  
tanos , alteram post meridiem ad Neophy-  
tos. Erat sane cur D E O gratularemur fru-  
ctum , qui inde capiebatur. Quippe tantus  
Neophytorum animis diuinorum laudum  
carmina decantandi iniectus est ardor , vt  
Molucenses pueri in plateis , puellæ ac mu-  
lieres in tectis, agricolæ in campis, piscator in  
mari pro obscenis, ac vecordibus cantilenis,  
Christianæ fidei canerent rudimenta. Quæ  
quoniam in patrium eorum sermonem erāt  
conuersa, à nouis Christianis & que & Ethni-  
cis indigenis intelliguntur. Ac D E I benefi-  
cio Lusitani huius regionis incolæ cæteriq;  
tum Christiani, tum Ethnici, breui ita mihi  
cōciliati sunt, vt inuenire gratiam in oculis eorū.

Inde in insulas, quas Mauricas vocāt, trāl- *Mauricas*  
misi, leucas à Maluco L X. In his multi erant *insulae*,  
Christianorum vici, iam diu inculti, tum  
quod absunt ab India longissime, tum vero  
quod indigenæ sacerdotem, qui apud eos  
vnus erat, interfecerant. In insulis infantes  
plurimos baptizaui, & trimestri spatio (tādiu  
enim ibi moratus sum) lustrauit omnia Chri-  
stianorū loca, eosq; mihi Christoq; deuinxi.  
Insulæ

Insulæ omnino sunt propter intestina odia,  
ac bella ciuilia, periculorum plenissimè: gés  
barbara, funditus expers litterarum. quip-  
pe nec vlla habet litterarum monumenta,  
nec quisquam est, qui scribere norit, aut  
legere. vulgo quos oderunt, veneno tol-  
lunt de medio, atque hac ratione necantur  
quam plurimi. Terra est aspera, & sterilis ali-  
mentorū: frumento caret & vino: caro quid  
sit, fere incolæ ignorant. nulla enim apud  
eos armenta, nulli greges præter paucos ad-  
modum sues, quos mirari magis, quam gu-  
stare licet. Apri abundant. Aquæ dulcis ma-  
gna inopia. Orizæ satis est. Magna copia ar-  
borum, vnde panem & vinum petunt: alia  
porro arbores sunt, ex quarum cortice de-  
pexo conficiunt vestem qua vtūtur omnes.  
Hæc vobis fratres carissimi eo scripsi, vt scia-  
tis, quantopere hæ insulæ cœlestibus affluat  
gaudiis. Nimirum hæc omnia pericula atq;  
incommoda C H R I S T I domini nostri cau-  
sa suscepta thesauri sunt cœlestibus solatiis  
refertissimi, sic prorsus, vt has insulas perap-  
positas esse credas, ad lumen oculorum pau-  
cis annis ex suauissimi fletus suauitate per-  
dendum. Evidem nunquam alibi nec tam  
liquidis perpetuisque animi voluptatibus  
perfusum esse me memini, nec tam leuiter  
labores omnes, & ærumnas corporis pertu-  
lisse: quāquam insulas concursarem cinctas  
inimi-

*cœlestis  
gaudia in  
arumnis  
pro Deo  
susceptis.*

inimicis, cultas ab amicis non fidelissimis,  
easdemque omnibus vel morborum subsi-  
diis, vel vitae tuendae praesidiis, atque adiu-  
métis destitutas; ut diuinæ spei, potius quam  
Mauri insulæ appellandæ esse videantur.

Iauaros.

Gens est in his locis ab Euangeliō aliena.  
Iauaros vocant, qui homines quoscunq; na-  
eti sint, interficere, immortalitatis instar pu-  
tant. Ac s̄æpe vsu venit, vt cum alienorū co-  
pia desit ad cædem, vxores ac liberos cædant  
suos. Iidem ingentes Christianorum faciunt  
strages. Vna ex iis insulis tota perpetuis pe-  
ne motibus terræ concutitur: ignemque ac  
cinerem euomit. Narrant indigenæ ignis  
subterranei tantam vim esse, vt rupes, qui-  
bus oppidum est impositum, conflagrent  
totæ. Id adeo verisimile videtur, s̄æpe enim  
vsu venit, vt faxa ignea erumpant, maxima-  
rum instar arborū. Vbi autē vētus existit ve-  
hemētior, è cauernis tāta vis cineris effundi-  
tur, vt viri ac mulieres laborātes in cāpis dō-  
mū reuertantur cinere oppleti, adeo, vt vix  
eorū oculi, ora, nares apparent. Dæmones  
magis credas esse, quā homines. Hæc ego ex  
indigenis cognoui, ipse non vidi. Quandiu  
enim ibi versatus sum, ventorum impetus  
nullus fuit. Illud etiam ex eisdem comperi,  
illiusmodi ventis perflantibus, tantam copiā  
efferri cineris, vt complures apros excecatos  
opprimat, qui, vbi remisit ventus, passim re-  
periun-

periuntur mortui. Eadem quoq; tempesta-  
te perhibent inueniri plurimos pisces extin-  
ctos in littore, quos videlicet eadem oppres-  
serit pestis. Argumento esse, quod pisces, qui  
cinere aspersam hausissent aquam, vulgo in-  
terirent. Percontantibus indigenis, quid tā-  
dem illud sibi vellet, inferorum sedem esse  
respondi, quo detruderentur quicunq; co-  
lerent Idola. Terrę motus quāti sint, vel hinc  
intelligi potest, quod die Archangelo Mi-  
chaëli sacro cum in templo sacrū facerē, vsq;  
eo terra contremuit, vt pertimescerem, ne  
ipsa euerteretur ara. Fortasse S. Michaël cū-  
ctos illius regionis cacodæmones diuino  
cultui aduersantes cœlesti vi male multatos  
fugabat in Tartarum.

Omnibus Christianorū pagis perlustra-  
tis, reuerti Molucum. vbi tres item menses  
contriui, diebus festis binas habendo cōcio-  
nes, alteram mane ad Lusitanos, alteram à  
prandio ad Neophytos, excipiēdo quotidie  
confessiones tum antemeridiano tempore,  
tum pomeridiano: Catechismumq; præter-  
ea inculcando. Catechismi labore perfun-  
ctus dominicis, festisq; diebus; Symboli ca-  
pita Christianis indigenis explicabam hoc  
ordine, vt singula singulis diebus capita ex-  
planās in Idolorū cultum inueherer. Quarta  
porro, ac sexta feria ad Lusitanorum vxores  
indigenas separatim verba faciebam de ar-  
ticulis

ticulis fidei, de præceptis Decalogi, de sacramentis confessionis, & Communionis. Eratum Quadragesimæ tempus, itaq; earū per multæ ad sacrosanctam Eucharistiam accesserunt, quæ ad id tempus accesserant nunquam. Sex mensium spatio, quibus Moluci fui, cum Lusitani, eorumq; coniuges & liberi; tum vero Christiani indigenæ magnos fecerunt in pietate progressus. Sub Quadragesimam non leuibus cum atroris indiciis non solum à Christianis, sed etiam ab Ethniciis digressus ex Moluco, Malacam versus ve la feci. Nec vero occupationes in itinere defuere. In insula quadam obuia quatuor Lusitanorum naues cum offendissem, substiti apud eos dies viginti. ter concionem habui, complures peccatis expiaui, multos ad pacem, & concordiam adduxi. E Moluco decedens, vt amicorū Neophytorumq; complorationem vitarem in digressu, repente nauim de media nocte consendi. Verum ne id quidē fatis fuit ad pfectiōnem meam occultādam. Ne multis. Deprehēsus ab illis sum. Tū vero nocturn⁹ ille digressus ab iis, quos Christo pepererā filiis, sic me affecit, vt magnopere vererer, ne quid incōmodi me⁹ discessus afferret illorū saluti. Ergo eis præcepi, vt certo in templo Catechismi exercitationē vrgeret cuncti quotidie: Neophyti autē breuē Symboli explicationem à me traditam ediscent.

rent. Sacerdos quidam pius mihique per familiaris hoc suscepit oneris, vt eis per binas horas quotidie operam daret, & semel in hebdomada ad Lusitanorum vxores de artculis fidei, sacramentisque Confessionis, & Eucharistiae sermonem haberet.

Malacæ cum essem perfeci, vt mortui in Purgatorio cruciati, itemq; viuilethali conscientiæ vulnere affecti commendarentur quotidie sub noctem per compita piorum precibus. Quod quidem vt excitabat ad pietatem bonos, ita improbis iniiciebat terrorrem. Ad eam rem ciuitas certum hominem constituit, qui quotidie noctu altera manu laternam, altera tintinnabulum tenens obiret urbem; & in compitis, ac viis identidem magna voce carmen huiusmodi decantarēt. Orate pro animis fidelium Christianorum, qui in Purgatorio torquentur. Deinde illud adiicerent carmen. Orate pro iis quoq; qui lethali peccato oppressi releuari non laborant.

*Rex Moluci.* Rex Moluci Saracenus Regis Lusitani patet imperio, idque sibi honori dicit. Proinde illum nominans vulgo Dominum suum appellat. idem loquitur perbene Lusitanice. Molucus regio non in continenti est, sed tota insulis constat. Insulæ autem, præcipue omnes sunt in ditione Saracenorum. Rex ipse quo minus Christianus fiat, non tam

Maho-

*Molucus.*

Mahometis religione impeditur, quam libidinis ac liberioris vitæ licentia: cætero-  
quin Saracèni nihil habet, nisi quod præpu-  
tiis caret à puerò, & centies duxit uxorem,  
centum quippe habet coniuges, præter in-  
numerabiles pellices. Saraceni Molucenses  
disciplinæ Mahometricæ sunt plane rudes,  
carent fere Cacizibus, pauci, quos habent, &  
imperiti sunt, & peregrini. Rex amice ad-  
modum me amplectebatur, sic ut eius regni  
proceres iniquo id animo ferrent. Expete-  
bat amicitiam meam, spem ostentans susci-  
piendæ aliquando Christianæ religionis, ro-  
gabatq; ne ab se propter Mahometricæ sectæ  
notam abhorrem. Quippe aiebat eundem  
à Saracenis & Christianis coli D E V M: &  
fore aliquando tempus, cum vtriq; in ean-  
dem coirent religionem. Quoties eum inui-  
sebam, summopere meo congressu letari vi-  
debatur. nunquam tamen efficere potui, vt  
ficeret Christianus. Hoc tamen expressi, vt  
polliceretur se vnum è liberis, quos habet  
plurimos, ad baptismum daturum, ea con-  
ditione, vt is deinde Christianus Maurica-  
rum insularum regnum obtineret.

Anno M. D. XL VI. profecturus in Mo-  
lucum scripsi ex Amboino ad socios, qui  
proxime è Lusitania venerant, vt anno infe-  
quenti, eorum aliqui nauibus, quæ ex India  
Malacam petituræ essent, eò transmitterent,

H itaque

itaque fecerunt: Tres è Societate, in his sacerdotes duo, Ioannes Beira, & Ribera Malacam tenuerūt peropportune, cum ego eodem ex Moluco reuersus appellerem. Vnū mensem vnā fuimus, cum maxima mea iu- cunditate. Ego vero non diffido tales cos fore, vt in insulis Molucis magno sint emolumento rei Christianæ. Molucum versus Augusto mense soluerunt. iter est bimestre. Malacæ cum essent, eos de Moluci moribus docui. Pro vsu quem habebam, præscripsi quemadmodum se cum illa gererent natio- ne. Tam longe absunt ab India, vt semel duntaxat in anno literas ab eis accipere pos- simus. Eisdem mandaui, vt quotannis de Christianæ religionis illis in locis amplifica- tione, deque spe, quæ in posterum ostendit, perscriberent Romam. Recepérunt se esse facturos.

Quatuor ipsos menses Malacæ substiti idoneam tempestatem ad traiiciendum in Indiam expectans: quod tempus spiritualibus occupationibus vacuum non fuit, vt cum omnibus vnu satisfacere nequirem, nonnullorum subirem simultates, quæ cum ex peccatorum pœnitentia nascerentur, ni- hil me offendebant, delectabant potius, quod sanctum eorum cōsilium declararent. Multum etiam temporis ponebam in dis- cordiis inimicitiisque tollendis, quæ inter Lusi-

Lusitanos viros bellicosos facile existunt. Catechismo absolute, pueris ac Neophytis Symboli explicationem inculcabam patro ipsorum vulgique sermone, ut percipetur ab omnibus: idem antea in Moluco feceram, ut euersa Idolorum superstitione, in eorum animis firma iacerem fundamenta Christianæ religionis. Hæc explicatio uno anno tradi commode potest, vicena circiter quotidie verba inculcando, ut à rudibus Neophytis facile mandentur memoriæ. Nam interea historia de Christi aduentu sæpius iteranda est, ut una cum explicatione penitus insideat, atque hæreat in mentibus. Ita demum veritatem agnoscunt, & fabulas, ac veneficia, quæ tum veteres, tum recentes Ethnici commemorant, execrantur. Mandaui diligenter certo sacerdoti, ut mei munieris vicarius quotidie antemeridianis horis, eadem illa ibidem inculcaret, qui se facturum recepit. spero fore, ut res Deo fauente cursum teneat suum. Discendenti mihi Malaca primarij ciues vehementer institerunt, ut eò duos è Societate mitterem, qui apud se suasq; coniuges & Christianos indigenas, sacras conciones haberent, itemque suis liberis, seruis, ancillis Christianam doctrinam traderent meo loco. Id illi tantopere efflagitarunt, ut tam pio postulato hominum præsertim de nostra

H 2      Societate

116 FRANC. XÄVERII

Societate optime meritorum omni ratione  
satisfaciendum putem.

Aprilis mense anni M. D. XLVIII. (hoc  
enim tempore naues Malacam, & Molucum  
petentes ex India soluunt) Malacę mercator  
Lusitanus vir magna religione ac fide, mihi  
de insulis per magnis (Iaponiam eam regio-  
nem vocant) nuper repertis multa narravit.  
Ibi in Christi cultu propagando longe plus,  
quam in quavis Indiæ parte profici posse;  
quod gens vniuersa sit sciendi cùpidæ preter  
cæteras. Cum hoc mercatore Iapón quidam  
venit; (Angeri nomine est) qui ex sermone cū  
Malacensibus habito, me conuenire statue-  
rat. Is cum in Iaponia pro familiaritate, Lusi-  
tanis quibusdam institoribus conscientia  
suæ aperiuisset vulnera, petiuit ab eis reme-  
diū aliquod sanandi animi, Deiq; placan-  
di. Itaque authores illi fuerunt, vt ad me Ma-  
lacam veniret. Paruit ille, & in eorum con-  
scendit nauim. Sed quo tempore is Mala-  
cam appulit, ego versabar in Moluco. Ergo  
ille re cognita, domum reuertitur tristis.  
Erat iam in conspectu Iaponia, cum repente  
exorta tempestate, non sine periculo aduer-  
sus ventus eum reiecit Malacam. Ibi de meo  
reditu certior factus, summo Christianæ re-  
ligionis cognoscendæ studio me conuenit.  
Lusitanicæ lingue haud ruditis est. Itaque sine  
interprete inter nos agebamus. Si cæteri La-  
pones

*Anger Ia-  
pon.*



pones similiter ut Anger, audi sunt discendi, profecto omnibus, quo quot repertæ sunt, gentibus ingenio antecellunt. Is cum Catechismi explicationi interesset, accurate sane Symboli capita referebat in libellum. Sæpe etiam in templo in cœtu populi, quæ edidicerat, memoriter recitabat, & multa acutissime percōtabatur, omnino est sciendi percupidus, quod ad percipiendam breui veritatem plurimum valet. Octauo, quam Malacam venerat, die, in Indiam contendit. Evidem optabam, vt in eam, qua ego vebbar, nauim cōscenderet; sed pro familiaritate, quæ illi intercedebat cum aliis Lusitanis potentibus Indiam, homines amicissimos de se optime meritos relinquendos non putauit. Cocini hominem expecto intra decem dies.

Percontatus sum ex Angere, quem dixi, vtrum si in Iaponiam cum eo profectus essem, censeret incolas Christi sacra suscep-  
tros. & ille populares quidem suos non con-  
tinuo his, quæ dicerentur assensuros esse re-  
spondit, sed multis interrogationibus ex-  
ploraturos, quid afferrem religionis, maxi-  
mè verò vtrum dictis facta congruerent.  
Quod si duo illa præstarem, vt & consen-  
taneo sermone satisfacerem ipsorum percō-  
tationibus, & probitate yitæ eorundē repre-  
hensionem vitarem, denique perspecta &

H 3 cognita

cognita Regem, nobilitatem vniuersam, ci-  
uesque cæteros ad ultos ad Christum vtique  
se aggregaturos; gentem enim eam esse, quæ  
ducem sequatur rationem. Mercator dein-  
de Lusitanus meus necessarius diu in Iaponia  
versatus commentarios mihi sane dili-  
genter scriptos reliquit de terræ descriptio-  
ne, gentisque moribus, deque cæteris rebus,  
quas partim ipsem et viderat, partim cognouerat ex auctoribꝫ sanc idoneis. Eos ego cō-  
mentarios his inclusos literis ad vos mitto.  
Quotquot huc ex Iaponia redeunt Lusitani  
mercatores, mihi confirmant, me si eò traie-  
cero, haud paulo melius illis in locis, quam  
in India operam positurum: quippe cum fu-  
tura sit res cum natione, quæ facile obtem-  
peret rationi. Præfigire videtur animus, me  
aut alium ē Societate ante biennium in Ia-  
poniam iturum. Etsi iter est periculosum,  
cum propter incredibiles maris illius tem-  
pestates, tum vero propter Sinarum prædo-  
num latrocinia; ut multe naues partim à flu-  
ctibus, partim à Piratis intereant. Proinde  
patres, ac fratres carissimi incolumitatem  
nobis à Deo precamini eiusmodi nauigatio-  
nem suscepturnis, in qua plurimi intereant.  
Interim Anger Lusitanam linguam perdi-  
scet: Indicas Lusitanorum opes, Europæorū  
artes, nostramq; viuendi rationem cogno-  
scet: rite comparabit se ad baptismū, mihiq;  
in Cas

in Catechismo, copiosaq; de Christi aduentu explicazione Iaponice vertenda operam dabit, siquidem perbene scribit Iaponice.

Octauus est dies cum perueni in Indiam, nec dum socios visere mihi licuit. Itaque de fructu ex his regionibus me absente percepto, quod scribam nihil habeo: Socios ipsos sua sponte de suis ad vos rebus scripturos arbitror. E Malaca in Indiam reuertens magnis sum defunctis periculis. Quippe nauis trium dierum totidemq; noctium tempestate iactata est tanta, quantam nunquam videre me memini. Complures è vectoribus iam mortem suam deplorantes vovebant, si diuina ope exempti essent periculo, nunquam omnino in posterum nauigaturos. Merca-  
*tores vitam redimere coacti sunt cunctarū mercium iactura.* Ego cum tempestas ma-  
xime sœuiret, D E o supplicans deprecatores adhibui, ex terris quidē primum nostræ So-  
cietatis homines eiusdemq; studiosos, dein de Christianos vniuersos, expetēs per Chri-  
sti sponsam Ecclesiam, cuius etiamnum in terra morantis assiduæ preces audiuntur in cœlo, cœlesti Regi quam diligentissime commendari. Inde superos ordine imploraui omnes, ac præcipue Petrum Fabrum, cū cæteris nostris, vt cum viuis tum mortuis deprecatoribus vterer ad irā diuini numinis leniendam. Deniq; omnibus vel Angelorū

*Æquis et  
nimi in a-  
stroci tem-  
pestate.*

H 4 ordinis

120 FRANC. XAVERTI

ordinibus, vel S. hominum gradibus sigillatim imploratis, quo facilius delictorum meorum innumerabilium veniam impetrarem sanctissimam DEI parentem patronam adhibui, quae cœli Regina nullo negotio quicquid orat filium, exorat. Ad extremum spe omni in immensis Christi Domini ac Salvatoris nostri promeritis collocata, tot tantisque præsidiis circumseptus longe maiore perfruebar voluptate, in horribili illa tempestate periclitans, quam deinde præsenti periculo liberatus. Me sane pudet nequissimum omnium mortalium in ultimo discrimine præ cœlesti letitiae tantam lacrymarum vim profudisse. Itaque dum Christum Dominum suppliciter orabam, ne me ex illo periculo eriperet, nisi ad paria, aut etiam grauiora pericula sui obsequij, gloriæque causa reseruaret.

Sepe numero mihi Deus indicauit interiore quodam instinctu, quam multis me vel corporis periculis, vel animi detrimentis prohibuerint supplicationes, ac sacrificia sociorum partim in terris militantium, partim cœlestibus fruentium præmiis. Hæc eo pertinent Patres, ac fratres in CHRISTO carissimi, ut pro tot tantisque beneficiis, per vos ipsos & Deo, & vobis persoluam quod debeo, quoniā ipse per me neutquam sum soluendo. Sermonem de nostra Societate ingress-

ingressus neque loquendi, neque scribendi exitum reperio; sed vel nolentem huic sermoni atq; epistolæ finem imponere nauium festinatio cogit. Clausulam autem nullam inuenio accommodatiorem, quam ut illud profitear, si oblitus vñquam fvero tui Societas I E S V, obliuioni detur dextera mea: adco quantū sociis vniuersis, & quam multis nominibus debeam perspexi. Ac D E V S quidem vestris precibus adductus hoc mihi tantum beneficij dedit, vt pro meo captu intelligerem quantum debeam Societati. Neq; enim tanta in me vis, atque virtus est animi, quæ tam cumulatū promeritum capere possit omnino. Veruntamen ut aliqua ex parte fugerem ingrati animi notam, D E V S pro sua benignitate, ac misericordia, aliquid mihi et si parum eius notitiæ est impertitus. Sed finis sit. I E S V M Dominum oro, ut quando in suā nos Societatem adscitos in hac ærumnosa vita congregauit, tandem in beata illa congreget æternitate in cœlestium societatem vocatos. Præsertim cum in hac vita cius causa, corporibus adeo distracti simus.

Vos si quid nobis aliquādo mandatis, aut in Moluco versantib<sup>o</sup>, aut in Iaponiam prefecturis, meminisse oportet ante triennium & nouem menses ad vos perferri non posse responsum: ratio in promptu est. Nam vestræ litteræ nono demum mense in Indiam

H 5 perue-

perueniunt, intercedunt deinde octo item menses, ut naues idonea tempestate petant Molucum. in profectione ac reuersione, ut secundissima nauigatione vtantur, menses consumuntur XXI. denique ex India post octauum mensem Romam litteræ perferuntur: idque cum ventis, ac tempestatibus nauigatur secundis. Nam interdum propter incommodas tempestates plus anno in Romano itinere ponitur. XII. Kal. Feb. Cocini.

*Iacobo Pereriae Malacam. Epist. VII.*

*Gratia, & caritas Christi D. N. &c.*

**O**MNINO libentius te vidisse, ante tuam in Sinas profectionem, quam nunc per litteras alloquor absentem; sed Prætor hybernare me voluit Goz. Itaq; mos ei gerendus fuit. Nam mihi quidem in animo erat in Comorino Promontorio meos socios interuisere. Sane gauisus essem, si tecum tanquam cum amico fidelissimo coram quædam super itinere Iaponico, quod post annum suscipere cogito, communicare licuisset. Comperi enim bonis autoribus, posse ex illa regione vberrimos animorum percipi fructus, Christiq; fidem inibi longe, ac late propagari. Mando tibi pro amicitia, ut prius quam proficiscaris in Sinas, mercem quandam compares sane pretiosam, quam Malacenses, Sinæque mercatores fere negligunt,

gunt, bonam dico, conscientiam, quæ istius- *Bona eov-*  
*modi hominibus parum admodum est no-*  
*ta. Vulgo enim mercatores ita sibi persua-* *scientia*  
*dent, si animorum suorum, conscientiæque* *merx pre-*  
*sua negotiū agant, se continuo decocturos.* *sios.*

Ego tamen Deo adiutore futurū confido, ut  
 Iacobus Pereria meus amicissimus magnas  
 bone conscientię secū afferens merces locu-  
 pletetur; tametsi cæteri eiusmodi rerū incu-  
 ria, ad egestatē redigantur. Evidem Deum  
 orare non desistā, ut te & deducat in Sinas, &  
 inde ad nos reducat in columē, auctioremq;  
 ac locupletiorē animi bonis magis vtiq; quā  
 fortunā. Mitto istuc Malacam socios duos,  
 alterū (Francisco Peræ nomen est) sacerdo-  
 tem, qui meo instituto concionibū, confes-  
 sionibū, institutioni puerorum, ac rudium  
 det operā: alterū huius administrū, qui Lusi-  
 tanorū liberos imbuat litteris, quo posthac  
 pios, ac salutares libellos lectitent citius, quā  
 codices litigiosos Malacensium, quibus le-  
 gendis pueri fiunt Malacenses è Lusitanis.  
 Christus dominus tecū fit, perinde atq; ego  
 illū mecum esse cupio. IV. Non. Apriles. Goz.

*Francisco Henrico in Trauancoridene:*

*Epist. VIII.*

*Gratia, & caritas Christi D. N. &c.*

**E**GO vero mallem, frater carissime, corā,  
 quam per litteras tecum agere; tibique  
 pro

pro laboribus, & incommodis, quæ CHRISTI causa sustines, aliquid afferre solatij. Neq; enim eiusmodi solatia profecto expectis, quibus delectantur iij, qui hilariter iucundique ut viuant, huius vitæ voluptatibus perfruuntur. Etenim horum vicem miseriari debemus, illorum autem inuidere conditionem, quibus, ut Apostolus ait, *dignus non erat Mundus.* Noli mærere, frater, quod minus, quam velles, in istorum Neophytorum cultura proficias, quippe cum, & gens ipsa, ut scribis, Idolorum cultui dedita sit, & Rex à CHRISTI religione alienus acerbe infestetur Christianos. Plus vtiq; proficis, quam tu putas, infantes diligentissime conquisitos cœlo per baptismum pariendo. Nam si circumspicere animo voles, reperies profecto ex Indis, vel albis, vel nigris paucos in cœlum peruenire, nisi eos, qui quatuordecim annis minores cum baptismali innocentia excedunt è vita. Videsne frater carissime, te, vti dixi, plus isthic, quam putas, proficere? Id adeo cerni in pueris licet, qui abs te baptizati celesti iam fruuntur beatitudine, qua nimicum carerēt, si tu ex istis locis discessisses, neque eos per baptismum CHRISTO genuisses. Enimuero sempiternus hostis animorum tē, quem vehementer odit, quam primum istinc excedere exoptat, ut ex isto Trauancoridis regno in cœli regnum nemo vocetur

vocetur in posterum. Genus est eius insidiarum, maiorem alibi diuini obsequij spem ostentare: ut videlicet solicitet, atque auertat eos qui utiliter vbi sunt, operâ nauant D E O<sup>r</sup>. Itaque vereor, ne te suo illo artificio aggressus idcirco solicitet, vt ex istis abigat locis. At memeto te octo mēsibus quib<sup>z</sup> istic versaris, plures animos conseruasse, moribūdis, infantibus baptizandis, quā omnibus annis, quibus in Lusitania atque India fuisti. Quare desine mirari, cur tibi tantum facessat negotij Sathan. Quippe ille id agit, id pugnat, vt te de ista regione expellat in aliam, vbi saluti consulas pauciorum. Illud autem scito, quod tibi gratum fore arbitror, sōcios complures mēse Septembri ex Lusitania aduenisse. His ego Goa discedens imperauī, vt nobis venirent auxilio. Nunc refero me Goam pīj cuiusdam negotij causa, quod si conficerem potuero, magna me spes tenet, Christianos factum iri quam plurimos. Tu D E V M depreceris velim, vt tametsi nostra peccata impedian, quo minus idonei eius administris simus; ipse tamen pro sua bonitate infinita, immensaq; in homines caritate, ad religionis propagationem nostra qualicunque opera vti ne grauetur. XI.

Kal. Nouembris. Pū-  
nicali.

P. Ignā-

P. Ignatio Loiolæ Præpos. Gener. Romano.  
Epist. IX.

Gratia & caritas Christi D. N. adsit nobis semper. Amen. Mi Pater in Christi visceribus vnicē.

ET si litteris sociorum, quæ hinc Romā proxime missæ sunt, certiore te factū arbitror, quam feliciter his locis res Christiana, vestra deprecatione, Deique beneficio geratur; tamen videntur etiam nōnullæ meæ partes. Itaque pauca quædam de hisce locis tam procul ab Urbe remotis hac epistola perstringam. Primum gens omnis India in vniuersum (quantum videre potui) est admodum barbara, nec quicquam nisi suis, hoc est, barbaris moribus consentaneū auet audire. de rerum diuinarum, ac salutarium cognitione nihil admodum laborat. Ingenio plerique sunt prauo, & à virtute abhorrenti. Incredibili mobilitate animi, atq; incōstantia, fide exigua, ac pene nulla: tanta est consuetudo peccandi, atque fallendi. Hic nos tum in Christianis excolendis, tum in conuertēdis Ethnicis, multum elaboramus. Proinde par est nos filios tuos præcipue tibi curæ esse, tuisque apud Deum precibus continentier iuuari. Neque enim te fugit, quantum negotij sit homines erudire, qui neque Dei noticiam habeant, neque pareant rationi;

tioni; sed alienum ac minime ferendum pugnent, auocari à consuetudine peccandi, quæ iam naturæ vim obtineat propter vetustatem.

Hæc loca sunt sane laboriosa, vel propter summos aestatis calores, vel propter maximos hyemis ventos, atque imbræ. Alimenta atq; subsidia in Socotra, Molucco, Promontorio Comorino perexigua; labores tum corporis tum animi propter ingenia hominum, quibus conflictandum est, ingentes plane atque incredibiles. linguae insuper harum nationum haud sane faciles ad cognoscendum. Discrimina porrò vtriusque vitæ, & plurima, & maxima. At qui vt omnes è Societate Iesu immortales Deo gratias agant, illud liquido affirmare possum, socios hosce omnes, eosdemque filios tuos, qui in India versamur, maximæ Deo esse curæ, vt diuinatus non solum animorum, corporumque periculis eximamus, sed etiam omnibus (id quod omnes summopere mirantur) Lusitanis priuatis pariter, ac Magistratibus, Præpositisq; Ecclesiasticis; itemque Indis, tum Christianis, tum Ethniciis cari simus, ac iucundi. Atque Indi omnes, vel Ethnici, vel Saraceni, (quod adhuc intelligere potui) sunt admodum imperiti. Quapropter iis, qui hæc loca Euangelij propagandi causa peragraturi sunt, non tam litteris opus est multis,

multis, quam virtutibus; maxime vero obedientia; perseveratio, patientia, caritate, eximiaque aduersus plurimas peccandi illecebros castimonia, denique non vulgari consilio, ac prudentia ad res gerendas, valetudineq; ac robore animi, & corporis ad perferendos labores, & erumnas. Hęc eo scripsi, quod necessarium existimem spectari diligenter virtutes eorum, qui posthac sunt in Indiam venturi. Quod si qui satis probati nō erunt, quæso te, sint eiusmodi, quibus magnopere confidas. Tales enim India desiderat, viros scilicet egregia castitate, atque humilitate, qui nullam speciem præ se ferant superbiæ, atque elationis:

*Virtutes  
Rectori ne-  
cessariae.*

Quem missurus es Rectorem Goani Collegij, alumnorum indigenarum, itemq; sociorum, hunc præter alias Rectoribus necessarias, duabus potissimum laudibus præditum esse oportet. Primum singulari obedientia sit insignis, ut obsequio, atq; humilitate benevolentiam sibi conciliet Magistratum, Präpositorumque Ecclesiasticorum. Vtrique enim, si vsquam, his locis obseruantiam, & obedientiam ab iis, quibus præsunt, vel maxime requirunt. Qui nos, si obseruantes dictoq; audientes esse videant, mirifice amplectantur; sin minus, penitus auersentur. Deinde facilitate excellat, affabilisque in congressu, atque sermone sit potius,

tius, quām seuerus, ac grauis, vt animos cum omnium, tum vero alumnorum, ac sociorū, quibus præfuturus est, omni ratione deuin- cire sibi & velit, & possit. Omninoque ne is sit, qui timeri se quām amari malit; atque id agat, vt per seueritatem, atque terrorem so- cios sibi commissos tanquam seruos in di- tione habeat, ac potestate. Iстiusмodi enim acerbitas multis exitum, paucis aditum in societatem patefaceret. Mihi vero nemini vis adhibenda videtur (nisi forte amoris vis, *Benignitas.* & caritatis) ad quenquam inuitum in Socie- tate retinendum ; sed potius à Societatis in- stituto abhorrentes dimittendos censeo, vel inuitos: aptos vero, & idoneos beneuole ac leniter tractandos, vt caritate deuincti in ea conseruentur, & virtutibus, ac meritis auge- antur, præsertim vero cum in his locis, tan- tum ærumnarum Christi Domini nostri causa perferant. Et sane, vt mihi videtur, So- cietas I E S V, nihil est aliud, nisi societas amo- *Societas I E S V* ris, atque concordiæ, à qua profecto acerbi- *Societas caritatis.* tas, ac timor seruilis lōgissime abhorret. Hęc eo spectant, vt virum exquiras huic oneri parem, & accommodatum, qui talis utique esse debedit, vt in imperando obsequendi magis præ se ferat studium, quām impe- randi.

Pro vſu, quem horum locorum habeo, il- lud mihi affirmare posse videor, per Indiae

I indi-

indigenas nullā aperiri viam Societatis nostræ apud eos perpetuādæ: Christianam autem religionem iis, qui hic sumus, superstitionem vix futuram. Itaque necesse est isthinc sociorum sublementa submitti. In omnibus Indiæ partibus vbi Christiani sunt, aliquot è Societate versantur. In Moluco quatuor, Malacæ duo, sex in Comorino Promontorio, Colani duo, totidem Bazaini, in Socotora quatuor. Hæc autem loca distant inter se maximis interuallis, velut Molucus ab urbe Goaleucas amplius mille, Malaca quingentas, Comorinum promontorium C.C. Colanum CXXV. Bazainum L X. Socotora CCC. Singulis autem locis unus est è Societate, quibus pareant cæteri. Et quoniam qui præsunt viri sunt prudentia ac virtute præstantes, à reliquis nihil offenditur.

Lusitani in his regionibus mari duntaxat potiuntur, & ora maritima. Etenim in cōtinenti nihil habent præter ea oppida vbi versantur. Indigenæ ipsi pro peccatorū magnitudine suorum ad Christianam religionem minime accōmodati sunt. Quippe ab ea sic abhorrent, vt molestissime ferant, si quando inferamus de illa sermonem. Rogari autē vt Christiani fiant, mortis instar putant. Itaq; in Christianis tuēdis opera in præsentia ponitur. Et sane si insigniora essent Lusitanorū in Neophytes studia, plurimi ad Christum se aggre-

aggregarent; sed cum eosdem contemni de- *Neophyto-*  
spiciq; Ethnici videant, nolunt videlicet fie- *rum contém-*  
ri Christiani. Quare cum in his locis mea o- *ptus conuer-*  
pera minime sit necessaria, cumque ex ido- *sonem im-*  
neis autoribus cognorim Iaponum regionē *pedit alio-*  
esse Sinis adiacentem, cuius incolæ omnes  
Ethnici sint, à Saracenis, Iudæisque prorsus  
intacti, nouarumq; rerum tum diuinarum,  
tum naturalium auidissimi, eò quam primū  
contendere statui. Hoc ego iter suscipio ma-  
gna animi mei voluptate, maiore spe, quod  
plane confidam in illa natione nostri labo-  
ris fructus solidos ac perpetuos fore. In Go-  
ano collegio, cui à S. Fide nomen est, tres alu-  
mnī sunt Iapones, qui eò mecum Malaca su-  
periore anno venerūt. Mira de Iaponia nar-  
rant. Adolescentes sunt optimis moribus,  
acerrimo ingenio, Paulus in primis, qui be-  
ne longam ad te epistolam mittit. Is octo  
mensium spatio legere, scribere, loqui Lusi-  
tanice perdidicit. nunc vſitatis meditationi-  
bus haud sane inutiliter exercetur. Religio-  
nis Christianæ mysteriis est imbutus satis.  
Magnā in ſpē venio, Deo adiutore Christia-  
nos in Iaponia factū iri quāplurimos. Equi-  
dē primū eorū Regē, deinde Gymnasia, & A-  
cademias adire cōſtitui, magno (vt ſpero) cū  
quēſtu animorū. Iaponū religiones, vt Paul⁹  
tradit, ex Cenico (quæ vrbs eſt vltra Sinas at-  
que Cathaiū, à Iaponia iter vni⁹, & dimidiati

I 2 anni)

*Cenico*  
*Vrbs vltra*  
*Cathaium,*

anni) adscitæ perhibentur. Ex Iaponia tum  
 de illius gentis moribus ac litteris, tum etiâ  
<sup>Cenicensis</sup>  
<sup>Academia.</sup> de religione, ac disciplina Cenicensi faciam  
 te per litteras certiorem. Etenim in Sinarum  
 regno vniuerso, atque Cathaio nulla alia vi-  
 gere fertur disciplina præter eam, quæ in Ce-  
 nicensi Academia longe celeberrima tradi-  
 tur. Ergo vbi perspexero illorum litteras  
 Gymnasiique doctrinam, tum vero fuse ad  
 te cuncta perscribam. Nec prætermittam,  
 quin dem litteras eisdem de rebus ad Aca-  
 demiam Parisiensem, ut ex ea reliquæ Euro-  
 pæ Academiæ illa eadem cognoscant. E so-  
 ciis vnum omnino Europæum ducere me-  
 cum cogito Cosmum Turrianum Valenti-  
 num, qui hic se ad Societatem nostram contu-  
 lit, ac præterea tres illos quos dixi, Iaponios  
 adolescentes; Proficiscemur Deo approbabá-  
 te, Aprili mense proximo. Abest Iaponia ab  
 vrbe Goa leucas amplius MCCC. Ex itine-  
 re & vrbs Malaca & Sinæ attingendi sunt.  
 Nullis verbis exequi possim quantū ex pro-  
 uinciae huius susceptione fructum capiam  
 diuinæ voluptatis. Constat enim iter pluri-  
 mis ac maximis tempestatum, syrrium, pira-  
 tarum periculis obnoxium esse; ut præclare  
 agi cum nauiculariis videatur, si alternæ na-  
 ues Iaponicum teneant cursum. Ego vero  
 interiore quodam animi sensu sic affectus  
 animatusque sum, ut Iaponicæ profectionis  
<sup>Slacritas</sup>  
<sup>in periculis.</sup> consi-

consilium abiiciendum mihi non putem, ne si pro certo quidem habeam maiora discrimina subeunda, quam vñquā antea in omni vita. Tantam mihi spem Christianæ religiōnis propagandę Pauli Iaponis sermo, vel ipse potius D E V s iniecit. Quam apposita & parata sit illa regio ad Euangelij semen excipendum, intelligi licebit ex ea narratione, quā cum his ad te litteris mitto.

In hisce Indiæ locis sunt ad quindecim Lusitanorum oppida, in quibus multa excitarentur domicilia Societatis, si ad ea inchoanda aliquid stipendiū ex publico Rex attribueret. Hac ego de re egi cum ipso Rege per litteras. Simonem quoque Rodericum de rebus omnibus certiorem feci, & simul admonui magnopere ē re Christiana futurum, si facta abs te potestate, ipsemēt huc transmittenet cū quam plurimis ē Societate magnaque concionatorum manu. quippe eius aduentu ( fauente videlicet Rege ) aliquot Societatis Collegia excitari posse. Mihi vero mi Pater, Simonis viri apud Regem gratiissimi aduentus in Indiam peropportunus videtur futurus. Veniet enim cum regia facultate, vel inchoandi collegia vel iuuandi Christianos, & qui sunt & qui forent, si esset, qui eis faueret. Velim super hac read Simonem scribas quid fieri velis. Antonius enim Gomes mihi narrauit, Simoni certū ac deli-

I 3 bera-

beratū esse cum multis è Collegio Conimbricensi traiicere in Indiam. Non defunt tū Romæ, tum alibi, Socij à concionibus, & à litteris alieni, qui magno hic emolumento rei Christianæ esse possent, si modo essent satiis experti, & cū cæteris virtutibus ad Ethnicos iuuandos necessariis, tum vero insigni castimonia ornati, magnisque corporis animique yiribus præditi ad ingentes horum locorum labores sustinendos. Huiusmodi igitur socios nobis ad arbitrium tuum curabis. Operæ pretium, Deoque ut spero, gratum feceris, si ad hos omnes è Societate, qui in India versamur, plenam præceptorū spiritualium epistolam miseris, tanquam testamentum quo minimis hisce filiis à conspectu tuo allegatis diuitias, atque opes à Deo acceptas impertias. Quæso te (quod tuo cōmodo fiat) ut nobis aliquādo geras morem. Henricus Henriques sacerdos est è Societate, Lusitanus vir egregiæ virtutis, & exempli is versatur in Promontorio Comorino. Maluarice, perbene & scribit, & loquitur: atq; adeo vnuſ pro multis fane vtiliter elaborat. Concionibus quippe, & priuatis sermonibus asscutus est, vt Christianis indigenis mire venerandus esset, & carus. Obscro te, vt tam bonum virum, tam laboriosum, tam vtilem C H R I S T I vineæ operarium qui portat pondus diei, & aestus, per litteras confoleris.

Cran-

Cranganorū oppidum est à Cocino milia passuum XX. Lusitanæ ditionis. hic Frater Vincentius è sanctissima S. Francisci disciplina, idemque Goani Episcopi socius, pariterque nostræ Societatis amantissimus seminarium instituit sane luculentum , vbi indigenæ adolescentuli facile centū aluntur, & ad pietatem, ac litteras informātur. Quanquam huic Vincentio benevolentia erga Societatem non concedit ipse Goanus Episcopus, qui vñus præest Indiæ vniuersæ, sed nostrorum hominum studiosissimus amicitiam magnopere expedit tuam. Quare velim ad eum scribas. sed redeo ad Vincentium. Is pro mutua benevolentia mihi confirmauit, velle se id Societati nostræ seminarium cōmittere, ac tradere. Proinde me rogauit etiā atque etiam , vt te de suo consilio facerem certiorem, sacerdotemque è societate curarem, qui seminarij alumnos doceret litteras, & Dominicis ac festis diebus ad domesticos, ac populum verba faceret. Nam prēter incolas Lusitanos, plurimi Christiani sunt accolæ in pagis LX. orti ab iis , quos S. Thomas Christianis sacris initiauit. Alumni porro seminarij è prima nobilitate. Hoc in oppido duo sunt templa alterū S. Thomæ, S. Iacobi alterum. Exoptat is, quem dixi, F. Vincētius, vt anniuersariam vtriq; templo peccatorum omnium Indulgentiam à Pontifice Maximo

I 4 cures,

cures, in dies Apostolis Iacobo, & Thomæ sacros, septenosque dies consequentes. Idq; ad augendam indigenarum pietatem, qui prognati à veteribus illis S. Thomæ Neophytis Thomæ Christiani vulgo vocantur. Idem præter has, quas dixi Indulgentias, sacerdotem, qui hoc in oppido concionatoris, & magistri munere fungatur, expectat. His ille beneficiis ita nobis erit deuinctus, vt & in vita, & post mortem noster sit futurus. Is vero hoc mihi negotium magnopere mādauit, dicique non potest, quam vehementer eas expetat Indulgentias.

Vnum ego abs te peto, vt sacerdos aliquis è Societate per annum mensibus singulis sacram mea causa faciat ad S. Petri Ianiculensis, in eo facello, vbi Petr<sup>o</sup> Apostle crucifixus dicitur. Itemque negotium des velim alicui domestico, vt ad nos de collegiis societatis, de Professis eorumq; officiis, deque Sociorum opera, fructuq; perscribat. Mandaui enim Goæ, vt Romanæ litteræ Malacam, Malacę, vt descriptæ multis viis ad me in Iaponiam transmittantur. Te ego pater animæ meæ, summeq; mihi venerade, positis humi genib<sup>o</sup> (sic enim hāc tibi epistolā scribo) tanquā si præsentē intuerer suppliciter oro, ne Deū p me in sanctis sacrificiis tuis, ac p̄cibus obsecrare desistas: vt dū vita suppediat, sanctissimę volūtatis suę mihi det, & plaine agno-

*Positis hu-  
mi genibus  
scribit ad P.  
Ignatum.*

ne agnoscendæ , & omnino exequendæ facultatem. Idem cæteros socios oratos volo,  
XIX.Kal.Febr.M.D.XLIX.Cocini.

## Eidem. Epist. X.

*Gratia & caritas Iesu Christi, Dom. N. sit  
nobiscum semper. Amen. Pater  
mi in Christi visceri-  
bus vnicē.*

TRINAS ad te dedi literas eodem fere  
exemplo, fusissime autem scriptas M.  
Simoni commendaui. Antonius Criminalis  
in Comorino Promontorio, cū sex aliis ē So-  
cietate versatur. Enim uero is, mihi crede, vir  
sanctus est, & adhas terras excolendas natus,  
eius similes, quorum i stic magna est copia,  
plurimos huc mittas velim. Ei Comorinen-  
ses socij parent. Idem Christianis indigenis,  
Ethnicis, ac Saracenis est mirifice carus. A  
Sociis quibus præest, quantopere diligatur,  
dici vix potest. P. Cyprianus affecta iam æta-  
te in Socotoram insulam proficisciit. Dis-  
cessurus est exeunte Ianuario, ducet secum  
tres ē Societate, sacerdotem vnum, reliquos  
adiutores. Socotra insula est in circuitu  
millia passuum ferme centum. tota ab eius-  
modi incolitur Christianis, qui multis ab  
hinc annis, Catholicis orbati sacerdotibus  
Christiani nihil habent præter nomen. Fe-  
runt se ortos ab iiis, quos S. Thomas Aposto-

*Antony  
Criminalis  
sanctitas.*

I 5 lus

lus Christianos fecit. In spem venio fore, vt Cypriani, & sociorum opera, se ad bonā recipiant frugem. Ea insula valde inops est à frugibus, & alimentis, eademq; satis aspera, & ærumnosa. Eò tamen Cypria. iam sexagenarius libentissime transmittit, confidens egregiam se ibi operam Deo nauaré posse, & simul expiare delicta iuuentutis suæ. Et quanquam initio affectam iam ætatem minime patiētem laborum excusabat; mox tamen professus est se, si opus esset, haud graduare iturum. Nicolaus Lancellotus etsi valitudinarius, nunc tamen melius habet, versaturq; Colani, quod oppidum est salubri cœlo millia passuum à Cocino circiter LXXX. ibi instituendo Societatis collegio præest. Ac sane multa his locis Societatis domicilia excitarentur si M. Simon (vt ad te antea scripsi) cum magna ab Rege autoritate missus non paruam huc adduceret sociorum manum, ex quorum numero sex septemue cōcionatores essent, complures confessionibus excipiendis, tradendis piis meditationibus, Ethnicis ad Christi fidem adiungendis idonei, viri omnes plane moderati, ac rerum periti. Scripsi etiam ad Regem de M. Simone, vt eum cum potestate mittat, non modo inchoandi collegia, sed etiam fauendi indigenis Christianis, atque Ethnicis, quos ad Christum quātuluscunq; aggregaret fauor.

Mitto

Mitto ad te Iaponicarum literarum notas. Iapones quippe ab aliis in scribendi ratione differunt plurimum. Nam à summo orsi directo ad ima descendunt. Quærenti mihi ex Paulo Iapone, cur nostro more non scriberent? Quin vos, inquit ille, potius more nostro: Etenim ut hominis caput summū est, pedes imi, sic par est, homines cum scribūt, à summo deosum directo ferri. Descriptionem item Iaponię, & morum illius gentis à Paulo summæ religionis, ac fidei viro acceptam tibi mitto. Post duos menses ego cum P. Cosmo Turriano, Paulo & aliis Iaponibus duobus soluam (si Deo cordi erit) in Iaponiam. Inde quid eorum literis cōtineatur, ad te perscribam. Nam ex Paulo homine idiota cognoscere non potui, quod nunquā attigerit Iaponica literarum monumenta, quæ (similiter, ut apud nos libri scripti Latine) aliena quasi quadam lingua loquuntur. IESVS Dominus noster doceat nos facere voluntatem suam, & huius vitæ laborib⁹ perfundatos ad beatam illam eternamque transferat sedem. Amen. XIX. Kalen. Febr. Cocini.

*M. Simoni Roderico in Lusitaniam.*

*Epist. XI.*

*Gratia & caritas Christi D. N. sit nobiscum semper. Amen.*

NVLIS

**N**VLLIS consequi verbis queam , Si-  
mon frater carissime , Antonij Go-  
mes , & sociorum aduentus quantum mihi  
lætitie attulerit . Scito igitur & ipsos , magnos  
in pietate progressus facere , & virtę exemplo ,  
concionibus habendis , audiendis confessio-  
nibus , cōmentationibus proponendis , pri-  
uatis congressibus rēm Christianam mi-  
rum in modum iuuare , magna omnium vo-  
luntate . Nimirum egregiis hic Societatis vi-  
ris opus est ; maxime verò in vrbe Armazia ,  
& oppido Dio , quæ loca haud paulo magis  
quām Goa , concionatoribus egent piis ; ita  
multos Lusitanos habent à Christiana disci-  
plina , rituque degenerantes . Itaq; vt néces-  
sitati seruiam , statui Antonium Gomen vi-  
rum concionandi , aliorumque Societatis  
munerum facultate prēstantem mittere Ar-  
muziam . M. Gaspar in Collegio S. Fidei ma-  
nebit . Næ tu magnam à D e o inieris gratiā ,  
si cum plurimis è Societate in Indiam traie-  
ceris , tecumque septem , octoue conciona-  
tores , aliosque magni vſus ac moderationis  
viros adduxeris . Neq; enim multis opus est  
literis ad Ethnicorum conuersionem , quod  
horum locorum gens barbara admodum sit  
& imperita ; vt homines etiam non multarū  
literarum , modo magnarum virtutum , ac  
virium , egregiam hic D e o operam nauare  
queant . In singulis Indiæ oppidis , vbi con-  
cionator

cionator esset è Societate cum alio sacerdo-  
te, qui eum in confessionibus audiendis, re-  
liquisque Societatis officiis obeundis adiu-  
uaret, sedes locari posset Sociorum, ad Lu-  
sitanorum, indigenarumque liberos exco-  
lendos.

Scripsi ad P.N.Ignatium, ut tibi faciat ve-  
niendi potestatem, itemque ad Regem, ut te  
multis comitatum Sociis, magnaq; cum au-  
toritate in Indiam mittat. Quod si contin-  
get, mihi crede, longe maiori quām tu pu-  
tas, tuus aduentus Christianæ rei erit emo-  
lumento. Alterum de quo scripsi ad Regem,  
illud est, ut consulat Lusitanoruī pupillis,  
quorum videlicet parentes amissa pro rege  
vita, liberos orbos inopesque reliquere, sti-  
pendium, ac victum parentibus debitū per-  
soluente nemine. Quare non esset alienum  
aliquot in India cōstituere collegia, vbi eius-  
modi pupilli nō alerentur solum, sed etiam  
erudirentur. Et quoniam Rex indigenarum  
quoq; saluti prospicere debet, ère Christia-  
na esset mandare, vt Christianorum indige-  
narum liberi certis in locis imbuerentur Ca-  
techismō. Itaq; ei scribo, vt ex Bazaini vesti-  
galibus ( si videatur) circiter quinq; nūmo-  
rum aureorum millia assignet ad eiusmodi  
aliquam domum aperiendam. Hæc omnia  
Regem Deo bene iuuante, per tuum aduen-  
tum facturum esse confido.

Cognoui

Cognoui nuper de regione Iaponia, quæ sita est vltra Sinas millia passuum amplius DC. Eius incolas acri esse ingenio, cupidosque discendi non modo diuinas res, verum etiam naturales, quæ disciplinis continentur. Id & Lusitani illinc reuersi perhibent, & Iapones quidam satis declarant, qui superiore anno mecum Malaca in Indiam profecti, nuper Goæ in Collegio S. Fidei Christianis mysteriis iniciati sunt. Id adeo intelligere poteris ex Iaponiarum rerum narratione, quam tibi misimus acceptam à Paulo Iapone cognomento S. Fidei, viro egregia fane virtute, ac fide. Is ad te scribit dese suisq; reb<sup>9</sup>, diuinisq; beneficiis in se collatis. Itaque ego mense Aprili proximo, in Iaponiā cū Cosmo Turriano nostræ Societatis sacerdote contendere statui. Sic enim mihi persuadeo, Christianam religionem illis locis longe latèque propagatum iri. Adde quod hic ego iam cesso, quippe cum propter Socios, qui hoc anno venerunt, mea opera Indis minime sit necessaria; præsertim verò cum breui aut ipse venturus sis, aut alium tuo loco misfuris cum magna caterua Sociorum. Equidem te ipsum venturum esse spero. Simul opinor fore, vt sub aduentum tuum, attenta à me Iaponia; rebusque abs te ex his littoris in India compositis (si rei bene in Iaponia gerendæ, vt spero, D e o fauente dabitur oc-

tur occasio) Goē nos reuifamus. Procedente  
deinde tēpore multi ē Societate in Sinas atq;  
ē Sinis in celeberrimam illam Academiam  
Cenicenā quē vltra Sinas & Cathaiū sita est,  
Dēo bene iuuāte penetrabunt Nam vt Paulus tradit, Iapones, Sinę, Tartariq; vniuersi ē  
Cenico oppido petūt sacra. Mandātur Iapo-  
nū religiones literis quibusdam reconditis,  
& vulgo ignotis, quales apud nos sunt Latine. Quamobrem Paul⁹ homo idiota, & in il-  
liusmodi libris plane rūdis, negat se habere,  
quid de patriis religionibus dicat. Vbi eo ve-  
nero Dēo approbante; quē sacrī ipsorū mo-  
numentis continentur, ad tescribā pluribus.  
Mihi quidem in animo est, simul ac Iaponiā  
attigero, Regē ipsum, & prēcipua gymnasia,  
quæ in regiis vrbibus sunt, adire; rebusq; o-  
mnibus perspectis explorata non solū in In-  
diā, sed ad Academias Lusitanię, Italię, maxi-  
me vero Parisiensem scribere, & simul ad-  
monere, ne dum toto pectore in doctrinæ  
studia incumbunt, vsq; eo soluto animo sint  
ac libero, vt de Ethnicorum inficitia, atq; in-  
teritu nihil omnino laborent.

Petrus Consaluuus Cocini Vicarius, i-  
demque nostræ Societatis amicissimus man-  
dat tibi per literas suum quoddam negoti-  
um. Oro te, atque obsecro, quicquid e-  
ius causa facere poteris, ne prætermittas,  
tum quod ad Regem pertinet, tum quod  
spectat

spectat ad beneficium Christianis suis popularibus expetitum. Ac pro certo habeto, eū verum, germanumque esse amicum Societatis, quippe qui Socios omnes Cocinum diuertētes perbenigne hospitio recipiat. Iam Goanis Patribus, cæterisque toto Oriente sparsis, ad vsum Missarum, octo decemue vi ni dolia istinc cures velim. Nam hic quidem vini, in maxima necessitate, summa est non modo caritas, verum etiam penuria. Itaque Socij Malacenses, Comorinenses, Socotorēses, Molucenses ad sacrificia vinum nullum habent, præter id quod subuehitur ex India. Nimirū vt Episcopo Goano, & Franciscanis vinū à Lusitania subministratur expublico, ita Goano Collegio S. Fidei, vnde ad cæteros Socios submittitur, ab Rege attribui oporteret.

In Socotoram insulam profecturus hoc anno est P. Cyprianus cum sacerdote uno, & adiutoribus duobus. In ea insula Saracenus quidam potens per vim, contra ius, fasque omne dominatur. is Christianos incolas crudeliter opprimit, ac diuexat: eruptosque eorum liberos Mahometicis initiat sacrī: ipsos infinitis malis, & ærūnis obruit. Peruelim vrgeas Regem, vt pro suo egregio religionis tuēdē studio, aliquādo prospiciat Christianis. Id adeo sine vllosumptu, nulloque negotio cōficere poterit, si classi Indicæ Mecanum

Mecanum fretum petitur et imperabit, ut Saracenorū impotentiam comprimat. Nam incolæ armis omnibus demptis, duroque oppressi seruitutis iugo, Saracenum nomen perhorrescunt. Te ego per IESVM Dominum oro, ut Socotoræorum libertati consulas, quandoquidem tam iniusta premuntur seruitute. Miserabilis platie species est eius insulæ. Annis superioribus ex itinere cum eò diuertissem, plane illorum miseratus sum vicem: adeo crudeliter eos maritimi Arabes vexabant. Totum hoc negotium nullo, ut dixi, sumptu, solo Regis nutu confici potest. Alphonsus Sosa, qui Prætor Indiae fuit, testis est locupletissimus, qui hæc omnia perspexit ipse oculis suis.

Michaëlem Vasium Goam remisi, quod alienum iudicarem finere eum redire in Lusitaniam. Postquam Antonium Gomen Goæ vidi, satius existimauit P. Gasparem Collegio præficere, ut Antonius omni solutus cura in cōcionibus, cōfessionibus ciuiū, exercitatiōnibusq; spiritualib<sup>9</sup> totus esset. Ad quę munia obeūda haud paulo plus habet quam ad regendū facultatis: cum præsertim domesticae administrationis onus egregie sustineat Gaspar. Præcipies, quæso te, ut quotannis huc aliquot è Societate submittantur, atque horum plerique sacerdotes. Scribes etiam Romam, & vbiq; Societas est, ut Conime-

K bri-

bricam mittant sacerdotes aliquot magnus  
vſu, ac ſpectata virtute, qui cum neque do-  
ctrina, neque dicendi facultate inſtructi ſint  
ad concionandum, aut ad Collegiorum mu-  
nera obeunda, iſtic ceſtant, hic in Ethnico-  
rum conuerſione magno vſui futuri. Etsi e-  
nim iſtis locis aliquid opis afferant, his certe  
longe vberior eorum induſtriae fructus ex-  
tabit. Si qui præterea Conimbricæ ſtudiorū  
confecerint curſum, eos huc ad nos eandem  
ob cauſam mittas eenfeo. Quæſo te, caue co-  
mittas, vt vlo anno ſociorum ſupplementū  
deſideremus. Nam qui verſantur in Goano  
collegio, nondum ſatis vſus, doctrinæ, ac  
virtutis habent ad conuerſionem Ethni-  
corum.

Bazaini Michaëlis Vasæi olim Generalis  
Indiæ Vicarij rogauit, terna numorū aureo-  
rum millia Rex attribuit domicilio extruē-  
do, vbi indigenarum Christianorum filij  
doceantur. Hic quidem opinio eſt, Regem  
illius domus administrationem penes So-  
ciatatem noſtram eſſe voluisse. Nam cum  
Michaële o& o, aut nouem ē Societate; Frā-  
ciscani ſex venerunt ē Lufitania. Verum Mi-  
chaël Franciscanis Bazainum deuectis, pe-  
cuniam, quam Rex autore Ioanne Castro  
Prorege, ad conuerſionem Ethnicorum af-  
ſignauerat, eisdem diſpertiendam, ac diſpe-  
ſandam dedit. Ego igitur Bazainum profe-  
ctus,

Etus, vt negotia quædam transfigerem Moni-  
lucensium Christianorum, cum Franciscanis  
collocutus sum, qui ad paucissimos redi-  
cti me etiam atq; etiam rogarūt, vt aliquem  
eo destinarem è Societate, qui & Neophytis  
necessaria ex assignata pecunia impertiret, &  
seminarium illud administraret. Itaq; Mel-  
chiorem Consaluu ibi reliqui cum adiutore.

Nuper Michaële Vasæo, & P. Iacobo Bor-  
bano mortuis, Collegij Goani curatio ad  
Cosmum Ioannem peruenit, qui reddituum  
procuratione & tectorum ædificatione sus-  
cepta, cum distineretur negotiis regiis, post  
aduentum Antonij Gomis eam curationem  
Societati penitus cessit. Nunc ex vsu est hæc  
cessionem regia autoritate comprobari. Ve-  
lim diploma cures, ac deferas tecū in Indiā.

Oppidum est Regis, nomine Crangonorum,  
XV. millia passuum à Coeino. Hic Col-  
legium est egregium à Vincentio Episcopi  
socio exædificatum, vbi Christianorum in-  
diginarum, qui Thomæi appellantur, liberi  
instituūtur facile centum. Sexaginta quippe  
vici Thomæorum Christianorum circa id  
oppidum sunt, ex quib' Collegij, quod dixi,  
alumni petuntur. Opus si quæris, omnino  
præclarum est ad aspectū, siue situm spectes,  
siue ædium descriptionem. Mirificam sane  
operam his locis Fr. Vincentius nauauit. is  
amicissimus mihi est, Societati que vniuersæ.

K 2 Con-

Confirmat se id agere, ut moriens Collegij administrationem Societati relinquat. Mirū in modum expetit sacerdotem ē Societate Grammaticæ peritum, qui alumnos litteris erudiat, & diebus festis ad populum verba faciat. Mos gerendus est homini: quæfo te, mitte eiusmodi sacerdotem, qui illi omnibus in rebus obtemperet. Cranganori duæ sunt ædes sacræ, vna S. Thomæ à Thomæ Christianis pie admodum celebrata, altera S. Iacobi Collegio adiuncta. Duobus hisce templis F. Vincentius Indulgentias Pontificias impertiri peroptat, solatia horū Christianorum, & incitamenta pietatis. Quocirca maiorem in modum abs te peto, vt siue per eos, qui Romę sunt, siue per Pontificium Nūtium, qui est in Lusitania, anniuersariam omnium peccatorum Indulgentiam cures, ex vigilia S. Iacobi, itemque S. Thomæ in octonos dies in sequentes: quam ego Indulgētiā his duntaxat propositam volo, qui Cōfessionis, & Eucharistię sacramētiſ rite procuratis, eas ædes Cranganori pie, casteq; adierint. Hæc duo, de sacerdote, & de Indulgētiis, quæ Vincētij nomine abs te postulaui, si curaueris, & simul ad eū officiosam epistolā misereris; nę tu hominem & tibi, & Societati in ppetuū deuinxeris. Eiusdē modi litteras, vt ad Episcopum quoq; ipsum des, nostræ Societatis cupidissimū, te etiā atq; etiam rogo.

Ora-

Oraui Regem per litteras, ut sacerdotem quendam (cui Stephano Ludouico Burano nomen est) sibi à sacello constituant. Id adeo non tam ipsius causa feci, quam quod sorores habet, & orbas, & inopes; quarum frater si quasi ex cohorte Regia vir honoratus habeatur, facile sorores collocet in matrimonio. His enim locis in connubiis, honestorū hominum, & apud Regem gratiosorum affinitas mire expetitur. Id si perfeceris, tres orbas puellas in tuto locaueris. Huius sacerdotis mater Consaluo Ferdinando Conciati nupsit. Optat igitur sacerdos ad vietrici benevolentiam sibi ac sororibus conciliandam ei gratificari. Itaque deprecatur, ut Rex illum suum vietricum in suorum numerū, sine vlla mercede, administrū adscribat honorarium. Sic enim in animum induxit suū, si vietricus quasi è cohorte regia erit, eū paterno amore in ipsum, ac sorores futurum,

Cū Franciscani omnes nostri amici sunt, tum vero eorum custos Antonius Casalius. is custodia abiturus post biennium, optat mirum in modum in Lusitaniam redire; quæso te, vt litteras illi ab Rege, & facultatem impetres, absoluto custodiæ tempore decadendi. Nam quintum iam annum hisce in locis D E O, ac Regi operam nauat,

P. Nicolaus Lancellotus Colanum à me valetudinis caussa missus conualevit in dies,

K 3 vir

## 150 FRANC. XAVERII

vir plane factus ad Colanensium voluntatē. Iam agitur de Collegio inibi instituendo, ubi pupilli in primis Lusitanorum, deinde Christianorum Comoricensium, & Thomæorum erudiantur. Nam oppidani, qui & pauci sunt, & à re familiari male constituti, seminarium ne inchoare quidem suis facultatibus possunt. Scripsi super ea re ad Regē, ostendens id negotium quanto tandem usui sit Christianæ religioni futurum. Transiges cum Rege, ut Indiae Prætori, itemque Procuratori suo mandet, ut id domicilium ex publico ædificet satis laxum, ad complures orbos tum Lusitanorum, tum indigenarum liberos alendos. Colani enim summa copia est, ac vilitas rerum omnium: & parua impēsa maxima alumnorū sustineri potest multitudo. Si ipse huc venies, Simon frater carissime, nimirum tuus aduentus magno, & rei Christianæ emolumento, & tibi gaudio erit; sed ita si regia instructus autoritate venias, ad Dei cultū, & Christianos indigenas subleuandos. Iterum te moneo, ut Regis, Reginæque opibus fultus huc venias, quo Præfetos & Procuratores regios contineas in officio. Tum demum enim omnium opinione melius de India, & Christi cultu mereberis.

Lætos è Malaca nūtios accepi de re Christiana à Francisco Pere, & Rocho Oliueria præclare gesta. Ex eorū litteris omnia cognoscet.

nosces. optimi autē ex Moluco nuntij perferuntur. Quippe in maximis ærumnis perpetuisque vitæ discriminibus Ioannes Beira, eiusque socij versantur, magno cum Christianæ religionis incremēto. Rumor de Beiræ cæde dissipatus mihi quidem inaniſ videatur. Ipſe ad me paulo ante de suis rebus, ærumnis, ac periculis diligētissime scripsit. Eius socij post discessum nauium ex Moluco, tres menses hyemarunt in Amboino. Interim Ioannes Beira eò ex Maurica venit ad Præfetum, rogatum, vt Lusitanorum manum Mauricis, Christianis auxilio mitteret. Reuertēti in Mauricam ex Moluco nescio quid illi grauius accidisse dicitur, quod ego neq; vlliſ litteris, neq; idoneis autoribus compri. Illud pro certo affirmare audeo, tanquā aurum in fornace probari eos, qui Deum ac proximos diligunt. Evidem haud scio, an nusquā in toto orbe Christiano ij, qui Deo student, & saluti animorum, tot laboribus tantisq; mortis periculis exerceantur, quot, quantisq; in Maurica regione. Velim Deum depreceris pro iis, qui illuc ierunt, & deinceps ituri sunt; propediem enim duos, tresue socios eodem mittere statui. Nimirum opinor Mauricas insulas plurimos nostrę Societati martyres parituras, vt breui non Mauri, sed Martyrij insulæ sint appellandæ. Itaque Socij, qui vitam profundere expetunt pro

K 4 Chri-

CHRISTO; bono animo sint, præcipiantq;  
gaudium licet; siquidem paratum habet se-  
minarium martyriorum, vbi cupiditatem  
expleant suam. Nauigatio in Iaponiam, ae  
Sinas (vt omnes mihi prænuntiant) est æru-  
mnarum, ac periculorum plenissima. Ego  
nihil dum vsu compertum habeo: cum illuc  
transmisero, quod post duos & dimidiatum  
mensem futurum arbitror, inde te certiore  
faciam de omnibus rebus. Ita vbi tu, D E O  
approbante, in Indiam veneris, anno opinor  
proximo, à me litteras Iaponicas accipies.  
Nunnius Ribera Amboini est, in oppido sa-  
ne tuto, & Christianis frequenti. ex eius lit-  
teris intellexi sane vberem fructum eius la-  
boris extare.

Socij quoq; qui in Comorino Promonto-  
rio versantur, magno sunt rei Christianæ ad-  
iumento. Id adeo ex litteris, quas ad te mitto  
intelligere poteris, vbi illi de omnibus rebus  
suis tibi perscribunt. Visum est D E O dulcis-  
simum fratrem nostrum Adamum Franci-  
scum ex hac vita euocare, vt ei plurimorum,  
maximorumque laborum persolueret præ-  
mia. Mors anteactæ vitæ respondit, que qui-  
dem, quantū ab aliis accepi, & ipse perspexi,  
sanctitate floruit. Vir fuit plane pius, ma-  
gnoq; animi ardore in Ethnicis ad C H R I-  
S T V M aggregandis. Evidem magis illi me  
cōmendo, quā ipsum cōmendo Deo; persua-  
sum

*Franciscus  
Adamus.*

sum enim habeo eum iam beatitudine, ad quam natus erat perfrui. Nunc ego Goam contendō; vt me ad Iaponicum iter in Aprilē proximum, mature comparem. E Goa in Cambāiam, ad Prætorem Indiæ, qui nunc Bazaini est proficiscar, vt is & Molucensium Christianorum rationibus consulat, & propiciat Sociis, quos illuc sum propediem missurus. In his vnuſ erit cōcionator, qui in regio oppido commoretur, præsitq; Collegio inchoando, vbi Maurorum Christianorū, Lusitanorūq; pupilli instituantur. Inchoabitur etiam aliuddomicilium, vbi præter orbos Lusitanorum filios, Iapones, quos D E O fauēte missurus sum, Christianis imbuentur mysteriis. Et quoniā nostri homines in India non Episcopo ſolum, & clericis, verum etiā cœnobitis, Christianisq; omnibus pariter, & Ethnicis cari acceptiq; ſunt; magnam in ſpē ingredior fore, vt his locis longe, lateq; Societas propagetur. Quare Simon frater carissime, da operam, vt quamprimum huc traiicias cum magnis ſociorū copiis, partim concionatorum, partim etiam aliorum. Vnum caue, ne adoleſcētulos plerosq; deducas, hic enim maiores triginta annis vſq; ad quadragesima desideramus, eosdemque cum cœteris virtutibus, tum vero humilitate, mansuetudine, patiētia, & ſcilicet castimonia ornatos. Meum hoc vitium eſt, vt ad te ſcribens nul-

K 5      lum

Ium inueniā finem. Vel hinc intelligere potes, quantū ex ea re capiam voluptatis, præfertim vero cū ad scribendū me contuli tuis literis prouocatus. Itaq; scribendi finē facio, et si finē reperire nequeo: confido autem fore, vt aliquando nos aut in Sinis, aut in Iaponia, aut certe in cœlo reuisamus; vbi, vt spero, singulari Dei beneficio ac munere in cœlestis regni societatem pariter vocati, Deo perenni bonorum omnium fonte perfruemur in omnem eternitatem. Amen. VI. Nonas Februarias. Cocino.

*Eidem. Epist. XII.*

*Crucis a-*  
*mor.*  
PISTOLIS omnibus in Lusitaniā Emmanueli Petro iam datis, naues Malaca venerunt, quæ certo nuntiabant, Sinarum portus Lusitanis penitus clausos & infestos esse omnes. Ego tamen profectionem Iaponicam, de qua antea ad te scripsi, haudquam abiiciam. Nam mihi nihil gratius accidere potest in vita, quam in maximis meis periculis, CHRISTI Domini, & Christiane religionis causa suscepitis, vitam trāsigere. Christianum quippe est in cruce magis quā in quiete lātari. DEVS nos in suo, beatorumque domicilio iungat. Amen. IV.

Kalen. Mart. Cocino.

*FINIS SECUNDI LIBRI.*

FRAN-